


五  
官  
縣  
志

十一

22.6213  
1030.073  
16

學校

Kodak Color Control Patches



正定縣志卷十一

學校

郡縣之學與太學相維創立自唐始宋置諸路州學

官元頗因之其法皆未具迄明天下府州縣衛皆建

儒學府設教授州設學正縣設教諭各一訓導府四


州三縣二生員府學四十人州縣以次減十洪武十

五年頒禁例十二條於天下立卧碑置明倫堂之左

其不遵者以違制論盖無地而不設之學無人而不

納之教矣生員初定數於國初未幾即命增廣不拘

額數初設食廩者謂之廩膳生員增廣者謂之增廣



生員又於額外增取附於諸生之末謂之附學生員  
凡初入學者止謂之附學而廩膳增廣以歲科兩試  
等第高者充補之非廩生久次者不得充歲貢也士  
子未入學者通謂之童生提學官兩畿以御史各省  
以道員在任三歲兩試諸生先以六等試諸生優劣  
謂之歲考一等前列者視廩膳生有缺以次充補其  
次補增廣生一一等皆給賞三等如常四等撻責五  
等則廩增遞降一等附生降為青衣六等黜革繼取  
一二等為科舉生員俾應鄉試謂之科考其充補廩  
增給賞悉如歲試其等第仍為六而大抵多置三等

二三等不得應鄉試撻黜者僅百一亦可絕無也

國朝悉因前制詳加考核俾生員知所勸戒焉

文廟 在縣治西北明洪武七年知縣洪子祥創建前廟

後學 縣丞李鼎為記 天順六年巡按御史盧秩遷廟居左學

居右 大學士李賢為記 成化十一年知府田濟重建 學士彭華為記

十六年知府余瓚嘉靖二十四年知縣邢尚簡增修

萬歷十八年都御史宋仕重修 自為記 四十五六年知

縣蘇繼歐王琨各增修 本朝順治九年知縣張師

成重修 編修梁清寬為記 雍正二年知縣李伯正重修 修撰陳憲

華為記 乾隆六十年知府楊濬文知縣劉浩重修 候選知縣

王定柱 道光二十八年知縣梁寶書重修 知縣王世

大成殿五楹 東廡十三楹 西廡十三楹

崇聖祠 在文廟後

文昌祠 在崇聖祠後明萬歷丙午知縣李若星建

名宦祠 在戟門東

鄉賢祠 在戟門西

興文閣 在櫺星門內泮池東

節烈祠 在縣治北崇正十一年知府范志完建道光

十年知府關炳改建 自為 同治四年重修 邑人胡元

敬一亭 在崇聖祠後今圯

儒學明倫堂 在文廟右成化十二年知府田濟重修

嘉靖中知縣邢尚簡萬歷中知縣蘇繼歐王琨相繼

重修

本朝遞有修葺

尊經閣 在明倫堂後今圯 東齋 西齋在尊經閣

前正齋在尊經閣後今改為教諭宅

東號房 西號房在明倫堂前僅存東號房二間

教諭宅 在明倫堂後尊經閣舊地也書房二間二門

一間正房五間東廂房西廂房數間傾圯幾不可住

訓導宅 在明倫堂西偏二門一間書房二間正房五

間訓導沈雲龍逐年修補尚完整

狀元樓 在教諭宅東北隅教諭陳鶴齡之子惠華隨

任在學肄業雍正甲辰以第一人及第特建此樓以

紀其事 今圯

舊志儒學兩廡漸就傾圯後為啟聖祠西之觀善堂

明倫堂僅存東西號房北為教諭訓導宅皆壞不

可居西偏地天啟元年都御史胡思伸割二丈為箭

道崇正二年都御史解經傳即後隙地為屋二十一

間收其月錢為養廉費後竟為營兵據焉此

國初時事與今迥不相同順治九年碑明倫堂進德修

業齋博士公署尚未修葺重加建立不知何年謹就

現存者著於篇

### 府學

文廟 在府治東金粟岡宋以前不可考熙寧三年龍

圖閣學士知府事吳中復創修 禮部郎中陸佃為記 元祐三年

蔡京守成德軍始遷而大之金明昌元年吳王宗憲

撤徙改建視舊有加又增其兩廡及廊為間十六先

賢大儒像凡數十人皆改圖之 良鄉令周昂為記 元大德九

年蘇州經歷范忠易銅祭器簋簋坫爵犧象罍洗簠

杓凡百六十 今尚存已不全 總管王良輔率僚佐輟月俸五

千緡命高貴家營之歲取子錢以供師生費學士王思廉為

記延祐三年學廡兩旁頽敝教授蘇夢麟請總府增

修益許魯齋從祀總府為記至順二年府尹張忙兀臺即

其殿廡門舍新屋楹三十有二規制乃備國子祭酒李朮魯獅

為本年教授趙璧刻樂戶碑學士兼國子祭酒歐陽元為記四年立

禮戶碑編修瞻思為記至正十七年府尹趙任重易先聖塑

像集賢院學士楊俊民為記元末燬於兵洪武四年知府郭勉重

修構堂於殿北置杏壇於堂南王簿曹京為記正統間巡按

御史鄭邕提學御史王琳景泰間通判周彥宇各加

修葺知府李善置祭器天順三年推官吳箴增修明

倫堂添建齋廡號舍五年巡按御史魯秩增建尊經

閣及梯雲步月樓於閣之左右大學士彭時為記成化四年

知府邢簡重修大成殿及兩廡神厨戟門禮部尚書姚夔為記

十一年知府田濟以學不稱廟鼎建堂齋學門倉庫

於尊經閣後易民地廣延三十丈建號舍與梯雲步

月樓環接旁列四齋曰明德曰崇信曰養性曰存義

又以前門鍾靈坊東路狹易民地拓之太子太保商輅為記宏

治八年知府張淑按圖籍復學之侵地十之三改建

明倫堂為楹六東西建觀樂亭大學士徐溥為記又鼎新文

廟立名宦鄉賢祠大學士劉健為記正德二年知府彭澤重

修嘉靖六年建敬一亭於廟前七年知府喻茂堅十

二年知府胡效才各修其頽敝者十四年知府宋宜

增廣泮橋建大坊與櫺星門並編修歐陽煥為記二十六年

知府唐臣重修四十一年知府查絳重修大學士袁煒為記

萬歷九年都御史辛自修重修自為記二十七年知府

秦臨晉增建魁樓天啟元年知府朱本洽重修太常寺少

卿趙南星為記國朝順治十五年知府佟彭年重修自為記

康熙二年知府李鏞金重修光祿寺少卿梁清遠為記五年知府

胡預續修吏部侍郎梁清寬為記十七年同知羅京重修兵部尚書

梁清標為記雍正十年重修學政吳應茶知府鄭為龍為記乾隆二十五

年知府鄭大進重修自為記四十一年知府方立經重

修學政羅源漢及自為記咸豐四年至同治八年相繼重修武

府同知王蔭昌為記

東廡修建見前

西廡同上

崇聖祠 在文廟東北明嘉靖十年建今改在大成殿

後

名宦祠明嘉靖十年建今重修

鄉賢祠明嘉靖十年建今重修

舊文昌祠 在城東南隅萬歷二十五年巡撫李盛春

建邑人梁夢龍為記今廢改為營房

舊魁星樓

在東南城上今已傾圮

新文昌祠

在文廟東魁樓北不知何年改移建或云

改二忠祠為之乾隆二十五年知府鄭大進五十六

年知府蔡封重修

自為記

新魁星樓

在文廟東南萬曆二十七年知府秦臨晉

增建代有修葺同治七年塌卸八年重修壯麗有增

於舊

六忠祠

在文廟東明正德八年建祀唐顏泉卿顏真

卿名二忠祠天啟二年知府孟騰芳增祀宋歐陽珣

曰三忠祠道光九年知府張範東重修增祀宋李邕

元釵納錫璋明徐標改為六忠祠

布政使屠之申為記

同治二

年知府徐鏞重修

自為記

關帝廟

在文廟西府學內廟也不知何年創建同治

九年重修

教授趙文濂為記

儒學明倫堂

在文廟西明成化十一年知府田濟建

宏治八年知府張淑重修嘉靖十四年知府宋宜嘉

靖二十六年知府唐臣重修雍正間葺之乾隆二十

六年知府鄭大進重修同治三年知府徐鏞重修

尊經閣五間建修見前今圮



敬一亭 在尊經閣後明嘉靖六年建今圯移建崇聖祠

教授宅 在明倫堂後照壁一座大門一間二堂三間  
迤東北書房二間堂西科房二間腰門一間正房三  
間東耳房一間東西廂房各二間房後北書房三間  
代有修葺同治九年教授趙文濂捐資重修

訓導宅 在六忠祠後大門一間二堂三間腰門一間  
正房五間東廂房二間

試院 在城東南隅府治西北其舊址也舊爲恒陽書  
院崇正十年改爲督學察院試士於此工頗不實崩

圯者屢矣郡人每以地庫隘屢請於官易之乾隆十  
七年知府富尼漢遂移今地

### 書院

恒陽書院 在城西北隅嘉靖二年知府王騰改天王  
寺爲崇正書院三十年御史楊選知府孫續改書院  
曰恒陽萬歷七年張居正以其鄉土譏之遂盡毀天  
下書院十一年改爲游擊將軍署四十一年御史傅  
振商知府周光燮推官魏運開協議捐鍰別置游擊  
署贖回書院重修葺之趙南星爲記崇正十一年知  
府范志完重修書院改建六諭樓十二年知府王追

駿改為督學行署

風動書院乾隆二十九年知府鄭大進改建自為記

尊聞書院乾隆四十二年知府方立經改建自為記道光

十年知府關炳改為恒陽

義學

府義學 康熙五十四年建

一在府墻東 一在縣學前

縣義學 康熙五十四年建

四在東西南北甕城內 一在新城舖

舊義學五 二在東西南月城 一在北門內俱萬歷

九年知府尹應元建自為記 一在府署東天啟六年推

官許世蓋改建自為記

學田

縣學學田上中下地共四十八頃七十三畝三分五厘七毫

又新增置三十四頃八十四畝二分一厘四毫順治二  
年巡按御史衛周印盡除其稅今僅二頃二十餘畝  
今昔異形舊地不可考矣

府學學田

隆慶三年三月置地五頃碑立明倫堂前崇正十五年置地一

頃四十七畝三分碑立明倫堂上今僅存八十四畝餘俱不可考矣

學額

府學廩生四十名 增生四十名 文生新進二十一

名 武生新進二十八名內有衛學八名

縣學廩生二十名 增生二十名 文生新進十八名

武生新進十五名

修正定府學記

周昂

人去古逾遠難於入道雖有詩書禮樂之說得其門者或寡使登夫子之堂瞻聖哲之像巍乎如得親炙而又於春秋將事之際觀牲幣豆籩之數升降俯仰之容厭然醉飽其心然後示以詩書禮樂之說則力少而功倍正定於河朔為大府大定己酉皇叔吳王受鉞來帥越三日見於廷慨然隘之有作新之意既命工北徙其正室去以十丈梁棟楹桷一易而新其崇及廣視舊有加而又增其兩廡及廊為間十六先賢大儒之像凡數十人皆改圖之用錢於公幾百萬

相助者倍之功起於明昌元年二月終於八月廟既成遠近皆悅於是學錄李藻等咸嘉賢王能知爲政之所先而邦人能勸於善也乃屬於昂昂因其請而有告焉自三代而降言士之賢莫如兩漢然西漢之士辭章典雅而志節未勝東漢之士風義高烈而文采有慚蓋未敢知其優劣然士之所信者孔子也孔子稱其門人之所長自顏淵閔子騫至於子游子夏有次第本朝自天輔以來專用文章取士士之致力於文也久也奚患其不至獨所謂志節風義使學者皆內此而外彼高視遠蹈期無媿於古而又推及於

鄉人以及於列郡遠邑深山窮谷之民皆奮於德然後知廟學之有功於人也

增修正定府學記

王思廉

延祐丙辰夏郡學教授蘇夢麟學正韓大明學錄焦悅合辭謂予曰恒府廟學建置之始無從稽考其遷金粟岡地則有宋龍圖閣學士知府事吳中復熙甯三年創建禮部郎中陸佃元祐元年記重修則有金常山周先生昂明昌三年記國朝己未歲踵修之則有遺山元先生好問記歷來五紀有奇矣至元辛未夏總管烏提嘗葺講授之堂結課之室則有東原崔迪

記四十五年於今矣上下兩旁風雨疎敝已甚憲司諸公倡議完復總府長二司亦贊成不憚改作殿基舊卑下崇以三尺棟楹榱桷瓦甍牖戶易腐敗以堅率三之二漫漶者鮮之東西廡講堂各益兩楹用廣狹隘故者因而新之華麗宏壯殆類初構一洗前日之陋稱侯邦泮宮之制七十子二十四大儒昔圖於壁剝落幾半繪以縑素爲不朽計宋九儒本朝許魯齋附焉祭祀陶器加四百餘事籩九十豆六十罍布九十此又餘力所及也其貲蓋憲司總府州縣官吏俸金富室巨族見義而勇爲者之所助不强取也始

正月成於五月其勤亦至矣夢麟等承乏教職目擊盛事不紀恐上官嘉績將遂湮沒無聞焉矧先世營繕列有碑刻以志歲月礱石已具敢屬筆於子予起身諸生不容以綿薄甘且一舉而宜書者三詎可緘默方今聖天子在上更張政瑟設科取士銳意復古而諸公以廟學風化之所由興人才之所由出承流順美知所先後一宜書也郡值南北大路餞迓往來略無虛日人民繁多甲於河朔牒訴徃忽疲於剖決於斯時也不半載卒此役非才力恢恢遇盤錯易於破竹而能之乎二宜書也彼爲身謀者曰簿書期會

吾責也違卹其他安苟且者曰三載吾及瓜矣何急於是天下事日趨於壞職此之由而諸公不爲身謀不安苟且奉公如私以勵偷惰三宜書也有三宜而不爲之發揮諸公固無負於我徒而我徒實有負於諸公也於是述其本末用告來哲

重修正定府學記

李朮魯翀

初鎮州置正定路隸以中山冀晉趙深蠡府一州五土地人民以奉我睿宗景襄仁聖皇帝懿莊慈聖皇后湯沐首務立學養士當是時也世祖聖德神功文武皇帝淵潛朔庭聞鎮之學緩未卽敘龍集丁未勅

有司勿怠事於是以金粟岡廟址崇殿廡闢黌舍太原元好問有記粵十有四年庚申卽位都燕統一八表置憲肅郡府鎮憲爲諸道之冠庠序闕畧必憲人府人胥議興治至元暨今雖屢加葺猶有未備至順辛未憲暨府議倡集楮緡三萬市物傭工募役自殿之廡自廡之門新其屋楹三十有二棟宇軒楯拱挾環合左右翔峙作杏壇於殿之北自廟徂學門垣棧桓循序森立瓦墁締築堅麗於舊先是府尹馬斯忽已基未構而去尹張忙兀台倅和則平治中和允升繼至憲使提其綱賓佐韓復理其目始克有濟其年

夏告成王申春府遣吏李明善介徵士瞻具狀來請  
志其績神嘗貳憲燕南義不容讓聿稻正定冀之東  
垣堯舊封也孔子祖唐虞以道政事河南程氏兄弟  
承先聖之緒道不墜地建安朱氏師則兩程哀輯遺  
言貫通折衷以悟百世我朝同符堯舜世道人心翕  
然大正洙泗淵泉日月昭朗今神聖繼興世日趨治  
鎮股肱郡也帝堯之思在焉朝廷之化先焉崇事先  
聖所以教也鎮土知所嚮徃下學上達遵經慎藝何  
德不進何業不修憲牧之輔治教縉紳之報君父於  
是乎在廼賦詩以慰鎮人士曰太行之山滹沱之水

孰古與美陶唐之里滹池之潞太行之所孰今與伍  
皇祖之士恒山嶙嶙滹水沄沄昊天生民思堯之仁  
滹水湯湯恒山蒼蒼帝堯相望於赫世皇始鎮之府  
時未忘武維士與女澤沐時雨龍德出潛萬方旣瞻  
春熙秋嚴自北而南皇風斯角時雍於變視彼侯甸  
恒鎮之先大殿周廡先聖之宇久未今覩誰敢予侮  
有廟有庭有戶有扇肅肅其凝昭昭其靈新是鎮學  
式對恒嶽惟士也確順我先覺求門於墻求室於堂  
伊洛考亭使我不盲惟聖之元惟王之素園冠方履  
天地之度侃侃闇闇天天申申如目之眴如躬之親

既儼既翼臨汝明德以賓皇國方州是則鎮人聚喜  
歸功憲紀憲人曰止其誰敢爾顯望神京稽首奉揚  
配天無疆天子之光

真定路學樂戶記

歐陽元

鎮陽郡學禮樂生通七十有八戶部刺史之所陳請  
肅政使者之所建明省臺部之所詳定既復其戶凡  
諸征繇無所與於有司矣教授趙璧學正孫誠學錄  
宋舉懼歲久籍湯謀壽諸石乃礮堅珉具梗槩請于  
郡人春官侍郎蘇君天爵訪元司成之館徵辭以記  
之元與蘇君俱以禮樂爲職事者也記可辭乎按郡

學始建置樂生十有六人春秋二仲上丁釋奠猶用  
俗樂延祐五年改作雅樂增置四十有五人至順二  
年援樂生例請設相禮及諸執事者又置禮生二十  
有五人尋增置八人然後聲容文物燦然最圻內諸  
郡夫三代以來學校之制學者入學無不學禮亦無  
不學樂當時弟子員卽禮樂生也更秦廢壞漢叔孫  
通以魯三十生及其弟子百餘人起朝儀於野外益  
州刺史王襄命王褒作中和樂職宣布等詩得郫縣  
何武與成都楊覆衆等習之宣帝以爲盛德之事召  
武等賜帛此禮樂生昉見史傳者也今鎮陽爲河朔



上郡戶口繁夥有司拔一二於千百以備一郡制作之美是豈小補哉矧叔孫通之徒皆起家拜爵爲郎何武它日仕至三公人材自此塗亦未可量也余感蘇君敬共桑梓之意故以遠者大者進而勗之戶在錄事司者二十有三曰陳惟仁李榮祖程宣差武秀實耿順和黃興和仁曹仙康天益郭榮祖傅聚劉進趙亨趙榜梁聚郭從劉郁李盛閔恭宋仲祿若陳興戶之楊德新謝寶戶之王宏毅皆在是數焉在真定縣者十有五曰董子政李演劉成張斌秦溫孫爵郭秉忠張德李文成靳用李順張清谷德閔德王祺在

欒城縣者曰陳用王慶在橐城縣者曰劉 李信在平山縣者曰李好古李楫是三縣皆二戶在古城縣者趙傑在無極縣者吳貫是一縣皆一戶云至元四年戊寅閏八月辛亥記

宣聖廟塑像記

楊俊民

像設果古之制歟古者有學無廟凡入學必釋菜釋奠於先聖先師不過設位立主而已廟且不立况像設乎然則像設非與蓋事有創於後世而不可廢者雖戾乎古有勸於今得隨時爲制之義君子必有取焉昔者夫子旣沒魯哀公卽宅立廟終漢之世不出

闕里魏晉以來漸及京邑由宋迄今天下無不建廟  
俾在在有所瞻仰人人有所依歸其於風化豈曰小  
補廟既增廣像設固不得而闕也或譏以此之形冒  
彼之名神果安乎是又不然面之寢揚萬無齊同槩  
曰人形未始不一設位立主固簡質自非聞道精  
禮之人未免漫爾視之漠焉奉之其何以致誠敬而  
動觀感乎今也衷以土木表以采繪風度尊嚴冕服  
彰明學者見之肅然敬惕然思其心必曰古人體貌  
不加多於我而我不逮古人獨何歟由是可以事神  
可以希賢又何必索形似於千古之上乎吾真定廟

制惟正殿塑像兩廡兩序圖以縑素至正十六年青  
州趙公任重來尹是郡剗繁理期年政成

監郡普顏公治中燮徹公泊普化公判官末里公泊  
多里公同謁廟廷升殿顒望而歎曰大聖生有異質  
祖庭所記固難盡以石本司寇之像卑陋不

稱四公十哲亦然當改爲之賢儒畫本豈能持久當  
易塑像真定河朔名郡願茲闕狀吾等不得辭其責  
也監郡以下皆曰茲固平素之志也卽日割俸倡率  
鳩貲如干市物募工公特選儒生五人考評制度俾  
末里公率三吏專督其役首卽殿上據圖易故次創

百有五像土木潔粹工徒齊戒各極心思之妙肇自  
二月告成五月集賢楊俊民郡之學者代

祀言還聞斯走謁仰瞻夫子藹然道德之光輝退閱  
諸賢儼然揖讓之儀容周旋殿廡如游洙泗之間徘徊  
徊眷戀忘其地之非魯也於乎異哉教授高齋學正  
張賁學錄段文素趨而言曰盛典方成先生適至願  
文之石以紀府公之善噫廟學政之急務不知者忽  
焉承平鮮舉多事遑恤今公等上給兵需下撫民瘼  
既各有方城池高深市門增壯不日而成牧守之職  
宜若無以加也復興化原曠典於百年之下使人驚

喜歎服新視易聽何其賢也非大尹剛毅有爲孰能  
倡于前非諸公協恭莫逆孰能和于後不有臬司贊  
勉其上其何以增吾道之光哉藁是數美夫豈偶然  
執筆欣躍不自知其文之陋也

至正十七年歲在丁酉秋八月癸卯朔

立石

洪武二年十月左丞相宣國公欽此奉

聖旨今後立學春秋休要祭祀設科分教禮樂射御  
書數 每定擬來欽此會集省臺部官逐一議擬於  
十月二十七日早朝奉天門奏奉

聖旨節錄學校合行的勾當教秀才每用心講究行

欽此欽依會議定擬到各項事理洪武二年十一月十八日中書省楊右丞陳叅政駐叅政右司郎都事禮部崔尙書於

奉天門東板房內奏奉

聖旨准教定立罪名同這格式各處學校都鑄在石碑上欽此

學校格式

一生員入學定例

凡各處府州縣責任守令於民間俊秀及官員子弟選充必須躬親相視人材俊秀容貌整齊年及十五

之上已讀論孟四書者方許入學其年至二十之上願入學者聽在內監察御史在外按察司巡歷到日逐一相視生員有不成材者黜退另行添補

上項生員如果赴中書省各行省相視誠恐路遠不便

一選官分科教授

禮律書共爲一科訓導二員掌教禮教律教寫字於儒士有學行通曉律令諳習古今禮典能書字者

樂射算共爲一科訓導二員掌教樂教數教射於知音律能躬弓能算法者

上項訓導禮樂書數律但是能一等或兩等者從各處守令考驗各取所長相兼教訓

府教授州學正縣教諭掌講明經史務使生員知孝悌忠信禮義廉恥通曉古今識達時務及提調各科訓導教書必期成效

上項教官 各處守令於儒士有才德有學問通達時務者選充官爲應付行糧脚力悉赴中書省考驗

一生員教習次第

侵晨講明經史學律 後學書學禮學樂學算未時

習射弓弩教使器杖舉演重石學此數件之外果有餘暇願學詔誥表牋疏議碑銘傳記者聽從其便

一禮樂二事見行集議比候成書

一生員額數 府設四十員 州設三十員 縣設

二十員

一師生 膳每人日支 二升 鹽醬在內於本

處係官錢糧內放支

一教官出身俸給定 第如果教有成效異材出

衆不拘資格優加擢用俸給就于本處係官錢糧內放支

一生員入學姓名 申報合于上司置立文簿付  
寫某州某縣某鄉某戶

一守令每月考驗生員

觀其進退揖拜之節聽其言語應對之宜背讀經史  
講通大義問難律條試其處決講禮務通古今寫字  
不拘格式審音詳所習之樂視射驗其膂力又能中  
稽明其 除口手相應守合置力文簿 授

載諸生所進功程如一月某生某科學不進則紀載  
于簿至此科三月學不進者罰此科訓導月米半月  
罰多不過一月

一監察御史按察司巡歷去處考 各府州縣教官  
生員

府生員十二員學不進者罰守令俸錢半月教授某  
科訓導各罰俸錢一月二十員學不進者守令罰俸  
錢一月教授及某科訓導黜退二十員之上學不進  
者守令答四十州生員八名學不進者守令罰俸錢  
半月學正及某科訓導各俸錢一月十二員學不進  
者守令罰俸錢一月學正及某科訓導黜退十二員  
之上學不進者守令答四十縣生員六員學不進者  
罰守令俸錢半月教諭及某科訓導各俸錢一月十

二員學不進者守令罰俸錢一月教諭及某科訓導黜退十二員之上學不進者守令答四十

一設學之後子弟習學各科限三年方成隸中書省者貢至中書省考試中選者就便量材錄用隸各行省者貢至各行省考試中選者貢入

朝廷選用

一各處府州縣於洪武三年正月爲始開學務要實効責任所在有司守令正官提調在內監察御史在外按察司每歲考覈學生功課比上年有進者有司官教官便是稱職各學生比上年學不進有司官治

罪教官黜退

一學校生員每府四十名州三十名縣二十名府州縣各設教授學正教諭一員訓導四員今擬府州生員四十名者設訓導四員每縣二十名已有教諭又設訓導四員似爲員多今擬州縣學正教諭外每處正設訓導一員其讀書生員如有增廣不拘定額及北平陝西河南地面人民稀少每州縣除學正教諭外正設訓導一員相應

一欽奉

聖旨今後教各府州縣儒學好生訓誨生徒每日講

讀文書罷時於學後設一射圃教學生習射但遇朔望的日子要試演過其有司官辦事閒暇時也與學一體習射若是有司官與那學官不宜用心教學生習射的定問他每要罪過欽此

一吏部擬到學官品級先擬教授正九品學正從九品教諭授省 令擬教授給與都省劄付學正在內授吏部劄付在外授行省劄付訓導授各府州付身先令試職一年俟有成效然後照依已定品級實授相應

一戶部擬到教授學正等官改擬試職俱令訓誨生

員所據俸給量擬教授月支米一石五斗學正月支米一石三斗教諭訓導各支米一石錢米三七兼支相應奉 都堂准擬

洪武七年十一月 日立石

增修真定府學記 縣主簿曹 京

真定為燕南鉅鎮其土地之饒山川之勝衣冠文物之雅由來尚矣郡之儒學由宋歷元荐罹兵燹殿堂門廡悉皆頽圯而明倫堂在大成殿東偏歲改月化邱墟瓦礫洪武四年秋太守郭侯勉字進道貳守梁侯賓字伯興來領是郡既而經歷蔣輔字世賢接踵



正定縣志 卷十一  
而  
而至知事陳 字 驥同心協力興廢舉墜越二年  
癸丑冬十月太守率同寅偕真定令葉思敬平山令  
沈亨靈壽令王士成元氏令劉原四邑長咸萃于庭  
從容語之曰方今

聖天子以文治天下而學校爲育才之地風化之首  
而吾真定廟學廢弛如此實吾爲郡縣者所當虞也  
今將嗣而葺之而諸宰皆孔門之徒爾其各奮爾志  
各供爾事毋費爾民財毋妨爾民務鳩工掄材要在  
簡便衆皆悅從之遂度地之宜迺構堂于殿之北而  
建杏壇于堂之南內外墻宇凡朽腐者易而新之缺者

補而完之殿堂門廡煥然一新實經營于洪武癸丑  
十月落成于是歲十一月二十有八日潔牲奠告徹  
畢用識歲月遂勒石書之

洪武七年五月

日

正定尊經閣記

彭 時

正定古河朔重地今爲畿南鉅府府之有學歷宋金  
元屢修屢毀國朝洪武初廟學一新天順己卯推官  
永甯吳篋復增拓明倫堂爲五間堂左右四齋凡十  
二間規制勝乎舊矣歲癸未巡按監察御史盧公祇  
謁廟畢勸勵師生已而周視後堂有匱列于北牖朝

廷頒降御製諸書并五經四書性理大全諸典籍之  
所在也乃慨然興所以庋藏之屬郡之志義者告焉  
衆畢從具工施材以助公於是營度經畫而知府苗  
君灝協心贊助擇官吏耆老之勤能者董其役值明  
倫堂得隙地因增築其址崇以五尺中爲閣其崇三  
十有七尺以經籍庋藏其上名曰尊經東西爲樓凡  
十有四以廣師生講習之所其東曰梯雲西曰步月  
又附閣左右爲庖廩各三以爲日用之需自始事以  
至訖工不踰一月而規模壯觀落成之日教授曾君  
子唯請予記之予惟興學勸士風憲者之當務也廬

公之功信不可忘諸君子於其所以揭示名警勵者可

不知耶今朝廷造士以易書詩春秋禮記五經爲本  
而取之必以科目爲重故曰尊經者欲士之來學惟  
經是崇以求實得於已也樓曰梯雲步月者欲士之  
窮經列乎科目以待見用於時也列科目而於經無  
得則非古之所尙崇經學而不階科目以升則非今  
之所貴是二者缺一不可其因時開教之意深切矣  
諸君子自今講習於斯尙益窮究經旨務體聖賢之  
道毋翫其華而遺其實乃所謂善學者以是而應當  
世之求辭藝皆實學之發推吾所得見之用則於致

君澤民開物成務隨所施爲無不可者其或違經背道幸階科目雖有所爲亦苟焉已耳奚足貴哉予故卽其所名申此爲諸君勸

正定重建大成殿記

姚夔

古者立學必釋奠於先聖先師所以尊德崇道以啟後學也漢唐以下或以周公爲先聖孔子爲先師或以孔子爲先聖顏子爲先師禮旣靡常義亦無據洪惟國朝斟酌古制參義定禮以學宮迪德之地聖以德言師以道言道德之盛莫如孔子前乎周公在七聖君臣之會不宜以先聖祀於學後乎顏子在四科

弟子之列不宜以先師號於廟惟孔子道大德全而不得君師之位以行堯舜禹湯文武周公之政教於天下於是著之易詩書禮樂之文以明父子君臣夫婦長幼朋友之倫修身齊家治國平天下之術使天下萬世知堯舜禹湯文武周公之道被其澤於無窮故制自國以及天下府州縣莫不有學學必有廟廟必祀孔子祀必以王禮而顏曾思孟四子配焉其餘七十子從祀於殿廡之間秩如也禮明義正誠足以洗前代之陋於戲盛哉正定甸南大郡學廟自國初設置迄百年日入於敝天順七年冬關右邢侯簡由

正定縣志 卷十一 學校  
三  
秋官來守觀廟宇弗稱亟圖修舉士大夫聞而樂趨  
焉財不阜而羨工不期而集首事於大成殿閱月而  
成隆以獸脊覆以琉璃臺陛欄楯巍如煥如次闕兩  
廡爲十四楹作大成櫺星二門各三楹高廣倍於舊  
以至更衣有堂儲器有庫庖廡宰牧有所碑樓廟表  
規制宏傑畿內曾未有過於此也功成請予文勒石  
於廟予嘗見侯之善政卓越已蒙朝廷旌異之典可  
書者不止新廟學一事而新廟學實爲善政之首於  
是乎書

正定重修文廟記

劉健

學校王化之首務國家需才以致治未有不先於設  
學先聖先師春秋以前各祀其國之所有漢唐而下  
乃專祀孔子於以一其進修之志而嚴其對越之誠  
自古迄今廟之所以並建也正定古恒山郡爲畿內  
近地廟學在府治東肇建洪武辛亥規制盛於一時  
由洪武以來屢加修葺然閱歲既久未免頽敝且界  
域逼近居民多爲所侵鎮原張君琬來知府事進謁  
瞻仰有重修之志宏治乙卯計公帑所積堪以濟事  
乃謀諸察案請於上官遂鳩工市材分委董役自是  
歲三月起工訖丁巳九月再踰歲而成廟自禮殿廊

庶神庫神厨以至尊經有閣名宦鄉賢有祠學自講  
堂齋舍以至觀樂之亭教官之廨宇列以重門繚以  
周垣廟貌深嚴廉隅崇峻禮神育材之意咸式稱焉  
張君既落成走書來請記余時以公私倥傯弗果而  
張君尋去爲河南大叅南昌熊君達實繼其任尤加  
意學之故址侵於居民十之三張君已悉復之學門  
猶爲市區所礙熊君以官錢易之東西各表以坊曰  
興賢育才始面通衢而宏廠壯麗視舊有加工旣訖  
遣人復申前請余惟設學育才固守郡者之所當先  
然所以爲教之方尤不可不知所向近時士子急於

進取率誦習前修之緒餘剪裁文字以便試捷而先  
儒所謂正學者漫不加省張君熊君以正學造士士  
能除去陋習由格致誠正上溯聖賢之道窮爲名士  
達則爲名公卿故書以勗之

真定府重修儒學碑

商 輅

古昔帝王建國君民所恃以導迪彞教而繫屬人心  
者惟學而已故自王宮國郡以及閭巷莫不有學攷  
之虞夏商周家塾黨庠術序國學罔或不備蓋可見  
矣吾夫子於學記亦曰君子如欲化民成俗其必由  
學乎致治首務成世有要於此者真定有學建于宋

之熙甯迨至我朝太祖高皇帝繼膺天命續古帝王  
舊服掃除胡元之陋習挽回虞夏商周之風而凡國  
都以及閭巷之間其學既完且備大宗文皇帝以至  
列聖相承益隆繼述學校之興無間遐邇矧真定在  
畿內者乎成化紀元知府關西邢君簡莅政之餘奉  
宣德意以廟學卑隘弗稱慨然以興建爲己責殿庭  
內外爲之一新旣而膺兩浙叅政之薦繼之者其同  
省田君濟以明進士良侍御出守大名復興是邦未  
幾威惠大行軍民樂業爰謁先聖廟禮成退坐明倫  
堂顧僚佐褚 謂曰廟新矣而學之梁棟蠹腐齋舍

傾圮何以作新士風而仰副明天子興學右文之盛  
心哉因疏以聞旣得請遂捐已俸爲倡凡厥有位暨  
富室之仗義者歡然從之乃召梓人度材陶人埏埴  
以至攻金攻石之工皆執藝事以趨卜日葺事去其  
故而新是圖廟之後爲師儒官舍者五區廟之西偏  
南向有講道之堂者十楹高若干尺廣若干尺旁列  
四齋曰明德曰崇信曰養性曰存義南爲門兩重各  
三間堂之後爲會膳之所者十楹高若干尺廣若干  
尺次其後爲尊經閣三間傑棟崢嶸層簷翬飛以藏  
經籍子史也閣兩直各翼以樓七間扁曰步月曰梯

雲期多士之有成也閣之外周圍號舍五十間俾諸生肄業之有其地也文昌廟三間舊在學門之西今改置戟門之東復爲門三間他若鄉賢有祠收受有庫觀樂有亭廩庖廡無不備具學之前後地逼於民居者悉償以重價而充拓之屋之創造於今者摠百二十間加以繪飾堅以垣墉經始于成化十二年之二月落成于成化十三年之五月是役也官無冗費民不告勞而規制宏麗遠邇莫加焉于是諸生者德咸以爲太守建學之功大矣所以加惠於邦人者亦至矣不可無述以傳示後來頃因教授葛君雍來

京具始末求爲記仰惟國家列聖授受正道是崇而國都郡邑既有學矣黨術里間無地非學也司教之官

固爲盛矣復設憲臣以懲其怠也作人之功惓惓如是今賢太守灼知上心承宣唯謹過於尋常俗吏不亦遠乎自今以往衿佩遊談之士必當朝斯夕斯優遊于絃歌誦讀之際以講夫仁義禮智之彝明夫君臣父子兄弟朋友之倫則以之修身而身無不修齊家而家無不齊他日出而輔世長民庶不負教養而賢有司作興之典其有補於治道豈淺鮮哉庸書此爲記

成化十四年歲次戊戌八月立

重修正定府廟學記

徐溥

真定府舊有廟學自國初草創規制卑狹暨府入爲畿輔而學制益稱歲久益敝殆無以爲瞻奉游習之地成化丙午平涼張侯琬自戶部郎中來知府事志新之積數歲財力皆裕計其事可濟始請于前巡撫都御史史公琳巡按御史張君聞鳩工聚財相地營制既有端緒而都御史高公銓御史田君澹繼至復申前請自宏治乙卯之春至丁巳之秋而成凡爲大成殿八楹崇若干丈深廣稱之東西二廡共七十餘

間外爲大成門六楹櫺星門四楹門之內鑿地爲泮池上爲石梁三殿之後築土爲臺上爲尊經閣六楹又爲神厨神庫各若干楹而學之制加于昔旣又按圖籍復學舍之侵地十之三合其舊而平之改建明倫堂爲楹六退省堂亦如之東西四齋爲楹各四號舍爲楹六十餘爲觀樂亭者二爲學宮廨宇者五爲庖爲廩爲門爲垣者皆備而學之制視昔益倍蓰焉于是卑者崇隘者廣敝者新爲師者有所據以爲教爲生者有所依以爲學爲官長者有所施以爲政信畿甸間盛舉也張侯乃以書來京師請予記學之有



廟尚矣夫學所以求道而道非孔子之聖莫能明舍孔子之道則教非其教學非其學風俗壞而天下之治隳矣故報享之祀尊事之禮必先焉而凡訓誨肄習儲養作育之事並行而不敢廢此雖中世之制而其來已久矣夫欲使道明于上化行于下者豈徒法制品式之具哉必有躬行實踐之功而後可以言學必有嚮往企到之誠而後可以言祀此爲士者之所當然而良有司所以倡率而興起之者也况甸服之近王化所先被天下之所視以爲輕重緩急者乎張侯之政故善其爲志亦勤凡經茲地觀茲制者皆將

徵其賢而况于親炙之者乎若修廢補敝使常存而不壞則又望于今日繼其任者南昌熊侯達焉佐是役者同知張景琦通判王汝安彭璋推官李資董治則獲鹿知縣呂澤元氏知縣常清新樂知縣劉麟臨城知縣郭賓饒陽知縣徐淮趙琮安平知縣呂鑑張經真定知縣徐銘凡若干人

明弘治十二年九月立石

重修真定府學記

歐陽暉

真定府學建于宋熙甯間我朝洪武初復緝之前守張公珮彭公澤又拓而大焉規制備矣甲於他郡顧

歲遠漸敝雖遞加修飾罔獲經久歲乙未宋公宜以  
南道試茲守正郡謁廟視學慨然有聿新之志以初  
治吏民或不相得每殷于懷旣逾年政通人和諸屬  
吏奉令惟謹境內肅然乃事事焉維時巡撫中丞劉  
公夔巡按御史王公曷皆曰可遂聯役集材募工釐  
度凡諸宮墻堂室之類咸易而新之增廣其泮橋之  
制俱構砌惟穀可垂永久復于學宮前建大坊與櫺  
星門竝而高出其右壯麗改觀以丙申三月經始初  
秋落成材以事輸各因其所有故不費力徵近地量  
與之值故不勞擇人付之而考其成故無苛仍舊貫

靡所更張故易舉民安其役士樂其業及諸當道者  
罔不嘉焉真定令江子濬教授方子恩馳書請予爲  
記以圖不朽云於乎可以觀政矣聖代稽古建學不  
揚風教庶政出焉是故明倫廣義考德迪業宣猷宏  
禮軌武飾文以順成天道培植化基不但以育士賓  
興而已也今司民之官加意學政者已鮮况真定畿  
內大藩民事頗殷又路當南北星軺之使絡繹而至  
非強有才力者將日不暇給奚以及此公蒞政未久  
遽懷永圖旬月之間協此令績其吏飭其工良其令  
簡而有常其民卒事而不倦吏飭治也工良勸也有

常斯安矣不倦斯裕矣推之政也吾恒之民賴之矣  
公字獻可別號仰山關西鄜州人賢而文在台憲有  
聲蒞茲土宜其有此政也史氏之職吏有善政率得  
書示來世矧予桑梓地乎是役也趙二府廷松李二  
府朝陽呂通府仲泉劉通府希簡唐少府頤共贊厥  
成號稱一時之良而承委董役則陰陽官李時中也  
若夫廟學規制前人已有記者不再述云

嘉靖十七年立石

重修真定府學碑記

袁煒

往予使唐藩過恒郡見其山河繡錯扼險屏塞屹然

爲甸服雄鎮蓋慨然慕其形勝之壯焉而竟以使事  
遄邁未能跨瀛海以頹諸關登常山以臨種代歷井  
陘以觀韓淮陰克成安君之遺壘又不暇周覽境宇  
詢其人文以驗古之英風義烈而遽然以去也距今  
十數年予受聖天子簡命置諸密勿晷夕不敢離左  
右回視向之不獲盡觀者雖每念不忘而未由觀之  
矣歲甲子秋孟真定教授高子述來言郡守查君絳  
治學宮狀徵予言記之予追念疇曩之迹而因竊私  
幸謂庶幾乎懷古之抱將緣是以寄之也按學建自  
熙甯中入國朝軼加釐葺而歲久復圯嘉靖壬戌查

君始蒞郡卽以敦教興學爲首務乃請于撫按兩臺得鳩工而治之凡殿宇亭祠堂廨庖溷悉華其舊而書樓射圃門房號舍視昔加倍芟撩跂翼棖桷翬飛蓋卽之值如望之歸如也其東爲二忠祠故唐常山太守顏公伯仲在焉併撤而新之以風郡之人士云經始于癸亥六月而事竣於甲子夏五費取諸公入之羨而力以徒戍營之不傷不害卒成偉績信非賢守不能也未及查君遷觀察副使往余泐于是郡士念君之功請諸新巡撫張公師載新守陳君奎以爲事關教化不可無述予惟查君之功在真定真定之

人宜知之不待予言以顯顧予之衷于此有深望焉夫真定在中山河北之地昔人所稱獷悍僇忮而多好氣矜節之士蓋自全晉已然而武靈王益厲之則其瓌奇特達以任俠相高亦其風所漸久矣以今觀古若樂毅藺相如李左車馬服君諸人勇悍仁強當世稱賢而頗牧之徒則摧鋒龕暴慷慨敢死尤較然不屈其志咸所謂錚錚佼佼燕趙烈丈夫也而漢中紀謠俗者遂譏其沙邱淫餘相隨椎剽女子或爲鼓瑟跼屣游媚富貴者斯何故歟毋乃教學之或弛而仁義中正之懿弗之薰陶而汨其性靈歟今恒之黷

校既視昔整煥矣其亟宣猷宏訓性命道德以養其  
心絃誦書禮以居其業俎豆揖讓以肅其度聲詩搏  
拊以和其志日有所就月有所將而大中至正之道  
浹其衷焉由是居常則修孝悌之行以親事其長上  
臨難則伏鑽死綬以殉公家之急甯復昔之慄悍懷  
急或至相隨椎剽游媚富貴者哉方今聖天子壽考  
作人久道成化海隅日出之地靡不率俾而况真定  
密邇帝畿濡沃聖化倡而之善甚易所貴立準示則  
約之中正是在司教者加之意而已語曰一道德以  
同俗斯立學之意也多士其勗之哉是役也建議者

查君爲甯國涇縣人舉庚戌進士而巡撫李公遷捐  
俸金三百首其事巡按董君學兵備道副使劉君應  
節僉允樂成法得備書云

嘉靖四十三年歲次甲子十一月立石

重修儒學文廟碑記

辛自修

萬曆庚辰冬修奉命撫常山入鎮城恭謁先師進諸  
生講克復敬恕之章類多體認真切有心學不徒記  
問訓誥已也於時仰頌聖代右文之化熙洽二百年  
餘乃畿甸賢豪士所得固宜獨深矣旣而瞻廟學圯  
壞不治竊謂興賢育才地方首務卽以明年春檄所

司修之於時直指李公棟范公鳴謙先後按治恒南雅有同心躋此舉爲不可緩署真定魏守任總其事命匠分工庀材葺事度支公帑而不以累民役取備力而不以動衆甯費毋省甯堅毋速蓋歲暮始克竣役云壬午元日余與范公瞻禮如常儀見廟制軒翔文采烜燿堂廡門廊之序肅如翼如相顧樂之曰茲學之修也蓋稱完美矣恒陽諸士其有興乎翌日兩學生劉培婁正學鄭相呂雲鶴輩詣余請曰學宮風教之宗也往歲敝未必修卽修未必實今茲之舉可稱盡善而永久矣願一言記之余唯唯謝又月餘諸

士復申前請余進而與之言曰爾諸士以修學問記抑知學之所以修乎夫學非他也所以學吾性分事也修學非他也所以修吾盡性事也且有司之修此學也閔恤廟庭整齊廊廡崇飾堂館繚繕門墉具如此其備也然後俎豆輝隆罔課膚敏教以起敬而業有專攻修學告成事矣爾諸生之學之修則何以哉亦求之吾夫子之訓而已以仁爲宮庭以克復爲廊廡以主敬爲堂奧以人已爲門垣諸具備矣出而嚮用上以贊宗廟翼明堂竭委身致主之忠此學也下以列屏翰廣萬間宏宣猷濟世之澤此學也退伏草

野則閑與有家化行閭里俾一族一鄉有所觀法亦此學也茲爾多士之修之成也慨自實學日衰士夫古日遠譚富貴者渺風節矜功名者忘性分奇詭夸誕之流又高談元冥崇尚老莊于仁禮敬恕爲吾性分中實際者反詘曰第二義是皆不知學爲何物學之修爲何事也爾諸士生三輔首善地人傑靈秀旣已環拔聲名文物尤先淪浹矧幸遇明天子重道崇儒於校選登進之典每三令五申不以輕畀蓋欲諸生修實學臻實用不徒粉飾浮靡取具虛文已也爾諸生尙思所自勗焉嗚乎修學於有司成則記以石

修於諸士成則記以心記以石者不朽記以心者無盡若他日記石巋然存而士効乃無聞且弁髦其學焉是重負今日之修取愧茲石遠矣知諸士必爾不爲也念哉是役也督撫陰公武卿文武爲憲寵命維新士學有瞻仰臺察前院督學商公爲正校士恒山品隲精嚴士學有激勸今督學朱公璉文命誕敷士學有師程巡鹽曹公一夔屯田王公國觀風駐節士學有儀型而井陘備兵僉憲喬君木則終始于勞有功于茲學之修者故并書鏡石以記一時之盛云  
萬曆十年歲次壬午仲春吉日

重修郡學碑記

梁清遠

粵稽建學始於三代遠矣漢唐間立學而不以著令  
 宋至仁宗始詔天下咸立文廟羣秀彥于中奉俎豆  
 習禮讓以文太平之治焉由元歷明鄉國攸尚恒郡  
 學宮爲三十二城教化之倡人文之盛曩惟郡居者  
 稱最元明崇楨成寅豫之臨駐范公守恒時用堪輿  
 家言于櫺星門外三橋左右縈以垣墻義取諸肅靜  
 云爾已經念載于斯繕治不常廟學日以頽圯且兵  
 荒之後文風游遜于昔時茲

李公來蒞郡事下車首謁

先師毅然以興學教士爲己任乃捐俸議修命正定丞蔡  
 君承錫同學博尹君舉莘賈君一董庀材鳩工協謀  
 祇事傾者砌之覆者築之損者補之凡

廟堂內外建新修舊靡不完備復因諸生呈亦援堪輿家  
 言撤去門外垣墻使提橫恢廣壯雅冠于一時又以  
 啓聖祠頽廢日久上丁設棚而祭非所以崇我

先師水木源本之至意暫就敬一亭週葺扁額迎主於其  
 內東樓坊爲主生之地若不鼎新又非振揚多士之  
 氣不惜多貲一併光大輪如奐如翼如翬如

不且軒軒秩秩令人覩丹楹而神欽望橋門而色詡



也哉始於癸卯春越四月而工竣僉徵余記余思三代黨庠之法凡養老尊賢勸農考執靡不由學然其本曰明人倫而已公天性篤于孝弟故于建學明倫爲首重今冢宰上計典惟公卓異

錫之袍服又復奉

旨養親人倫之大公既克敦矣恒爲燕趙遺墟向固不乏才俊今得公作新之俾多士修行篤倫比于鄒魯異日真材輩出德業事功卓越俗流端自今日爲之始公諱鏞金號維九江南丹徒人乙未進士其守恒善政不可殫書而此其一端云

康熙癸卯季春立

重修郡學碑記

梁清寬

郡國建學所以闡聖道育賢才成國家右文之治者尙矣我

朝誕膺景運百度維新其於學校優崇之典視徃代有加真定爲畿輔鉅鎮學宮之制規模宏敞甲於他郡第歷歲旣久風薄雨蝕不無傾圯廿年以來蒞茲土者雖間一修葺然選選虛文塗墍旋舉旋墜益就頽落郡守胡公寶典是邦首以化民造士爲孳孳因朔望祇謁徘徊荒廢惻然者久之謂學宮根本之地風

化所關曷可令蕪穢若此遂決意鼎新焉始以力詘  
舉羸未能卒辦居三年爲歲丙午迺咨同列郡丞鄭  
公郡判黃公司理劉公相與協謀復倡三十一邑之  
長吏共捐俸金八百有奇旣命匠庀材仍揣一人董  
其役程功稱事由殿阼以及廡門莫不壯麗亦莫不  
堅完至若啓聖文昌舊設專祠然已若滅若沒制書  
明倫不蔽風雨圯壞又其甚者維時撤故易新功侔  
作始其事盡因其因盡創焉外則有若奎星閣以著  
文章三忠祠以揚節義是又居立教之尤重者靡不  
整飾以新且砌以崇階繚以周垣丹雘藻繪廟貌煥

然改觀矣是役也經始於三月之望抵九月朔日告  
竣凡五閱月而功成胡公蒞任三載嘉績善政不可  
殫述茲固其政績之尤著者云胡公諱預戊子科貢  
士遼東復州人鄭公諱章乙未科進士福建閩縣人  
黃公諱瓚明戊子科拔貢江南江陰縣人劉公諱振  
國辛卯科舉人廣東順德縣人督工府學教授黃道  
啓辛卯科舉人北直玉田縣人  
康熙五年歲次丙午菊月立石

重修文廟記

梁清標

古者設教有學無廟有虞氏之庠夏后氏之序殷之

警宗周之類宮其立於鄉國建之州黨者皆有定制及夫春秋釋奠則就其地設先聖先師之座故無所爲廟也人之隸于學者自八歲以至十有五歲而後士農始有分業士之秀者則升於太學其設教之官僅有大司樂大胥無所爲郡縣學官也迨漢武始詔郡國立博士弟子唐宗始詔郡邑各立孔子廟自是有廟復有專官而學之制大備然予嘗觀之上古學制未備之日士生其時者無不爭相砥礪忠孝廉恥之風彬彬可觀後世有專廟有專官宜士之興行倍于往昔乃反遜弗若豈古今學校之相懸哉亦化民

覺世之未得其人也蓋教官之設課文釋奠而外尤必以教士爲先予謂士君子筮仕其地自監司以迄守令莫不有教士之責特視爲可緩則置之耳教士且然若學宮之興廢有不若秦越人之視肥瘠乎兩漢之傳循吏如潁川零陵桐鄉諸賢凡其於課農桑治盜賊無不侈爲美談而其稱最者則一置學宮立左右生徒之文翁使以後世觀之則文翁所爲近乎至緩非有超于潁川諸賢而聲施到今遂爲循良之冠誠在此不在彼也予郡學宮兩廡傾圯郡丞羅君京捐俸金而重修之會學使者吳君國對按臨時羅

君署府篆請于吳君吳君亦捐俸金繇兩廡而遍修之而井陘道羊君琦郡守趙君瑾通守胡君文燿相與贊成迺煥然復舊觀焉嗚乎觀于諸君之所爲于文翁何多讓焉而司教姚君永煦司訓杜君顯思鳩工甚力自初冬至孟春而告竣又能教士舉其職者也自此予郡之居弟子員者瞻拜於斯竦於目而惕於心以忠孝廉恥相鼓勵人文蔚起不且倍于往昔乎異日予歸鄉里隨郡大夫後春秋歲獻一爵亦不忘所自己是爲記

康熙己未仲春立石

重修正定府學宮記

吳應棻

古者建國君民教學爲先上自國都下及鄉閭黨族莫不廣厲學宮以延登選造事綦重也三代選舉道殊而郡國學制日以大備顧地有廣狹力有盈絀師儒秩散而飭庀無權勸學巡行而轍跡易邁非有循良牧伯實心倡導欲其興行教化難矣

國朝文治邇隆涵濡溥洽山陬海澨家禮樂而戶詩書

首善風聲漸摩尤厚雍正十年

應棻

恭膺

簡命視學京畿按臨列郡釋菜之日宣揚

聖訓首以修葺學宮爲急務正定郡學創建已久歷代葺

治式廓規模歲月滋深漸以傾圮其泮池地極寬廣而文石頽欹無復芹藻之遺矣余循覽深喟亟商所以葺事前輩鄭刺史慨然以修復爲己任率先捐俸以倡僚屬且鳩工庀材躬自督理不閱月而殿廡堂舍煥然一新又濬泮池亘以虹梁清漪澄澈環橋歡忻忭舞稱盛事焉余謂正定爲畿南劇郡向轄州邑三十有餘

天子念其繁衝陞設直隸州以分治之今所轄者僅十邑耳夫因地制邑因邑制郡設以學校官以大夫師長廣則力或難周少則神有專注列邑分屬正以人才

蔚起直專化導而厚栽培析而小之實乃恢而廣之也刺史以館閣宿望出守名郡開拓宏模振興善教故能役不踰時規制具備茲郡自分轄以來賓興貢士入選寥寥歲在壬子學宮甫成適當京兆榜發郡之登賢書者且十人學校啓其機人才徵其實斯亦鼓舞作興之明効大驗矣繼自今藏修息游益相砥礪殫讀書稽古之功宏治遠通方之畧十邑之人才何不可倍蓰從前三十餘州邑乎漢時王褒爲益州刺史傲鹿鳴之雅作中和樂職宣布詩激揚風化文治勃興况滹沱恒山之壤環峙邦畿又得賢有司爲

正定縣志 卷十一  
之倡導俾多士興文敦行承

聖世棫樸菁莪之化出而黼黻太平羽儀王國以臻鳳翽  
鸞喙之盛他日播諸聲詩揄揚休美與雅頌相表裏  
則一道同風之治不於教學植其基哉故援筆以紀  
其實云

雍正十年歲次壬子冬十二月吉旦

重修府學文廟記

鄭爲龍

且自古學校之設所以振興文教培養人才典至隆  
也正定郡北鎮恒山南臨滹水地號名區化推首善  
而

文廟之肇尤爲特重其局勢恢濶規模宏遠瑞氣所鍾人  
文輩出凡擅文章之山斗優相業之經綸者代不乏  
人無一不發軔于此迨歷年久遠風雨摧殘正殿兩  
廡雖少有可觀至泮池牌坊等項則盡行傾圮蕩然  
無存矣爲龍恭膺

簡命蒞任茲士目覩心傷正欲捐俸設法及時修葺欣逢  
督學吳大宗師諱應棻者拔士京畿按臨正定親至學

宮詳加驗看遂慨然以恢復舊制爲已任多方指示  
復自行捐助倡率其先爲龍偕同十屬各捐已俸共

勦厥事鳩工庀材次第修理宜丹雘者丹雘之宜補

葺者補葺之于泮池則掘去壅塞挑濬及泉牌坊則重加建修完整如故又復栽樹數百株久之而枝幹凌霄菁葱煥彩亦未始非文壇生色之一助焉嗣後文風丕振科甲聯綿名公鉅卿接踵而起以仰副聖天子重道崇儒加意右文之盛心者皆

吳大宗師輔翼之宏功也爰勒諸貞珉以垂久遠云是爲記

雍正十一年歲次癸丑夏五月吉日

重修正定府廟學記

鄭大進

郡庠爲宋金粟岡遺蹟熙甯初吳公中復以龍圖閣

學士知成德軍作人今地記之者越州陸資政佃也佃奏名舉首中復亦進士及第二公桂林一枝獎進後學用以金粟顏其岡金元及明址如故而其制不可考今所治廟殿一學堂一重門二內外池橋一廡二祠五閣二亭一坊三皆數十年事余始來無完者因葺之始己卯至庚辰秋廟成壬午春學亦成余維聖王之治天下教養爲大北地自廢井田溝洫不講水旱時憂余竊嘆之若學校則興廢關人才盛衰書生二字偶遭詬詈坐此疑作興文教非爲政所急誣已考史中復峨眉代還無一錢歷任中外罷淫祠彈

宰執條郵兵不法狀風裁卓然韓魏公宣撫河北中  
復在正定力言青苗先事之擾魏公以聞後以疏救  
流亡爲當事所忌士論直之佃受經安石新政之行  
師弟子絕無忌諱識者以爲難其黜浮競諫紛更議  
郊廟大禮深得政體所著俾雅禮象春秋傳等書尤  
爲時重此二公者夫非自學校中來與跡其言若行  
有體有用則書生不足爲詬病當日之敦崇學校亦  
非迂圖郡人倘追溯起化之自而景其風徽則金粟  
岡萬斛之香藏於一粒卽以爲如來度世之津梁也  
可

倡捐小引

方立經

正定古常山郡

畿輔西南一大都會也

聖駕屢次經臨

宸翰昭垂光騰河岳府治之東金粟岡

文廟在焉相傳宋熙寧間吳公中復以龍圖閣學士知  
府事實創修之規模宏敞甲於他郡乙未冬予奉

簡命來守茲邦首視學展謁之餘竊見廡閣傾頽墻垣圯  
塌心甚怵然曰檢志代有興葺自因韓江鄭公竭力  
經營距今纔十六年何遽殘敝至斯耶或曰沙灘易



圯或曰霖潦交侵予以受事初民不相習亦未敢出一語適今春兩川蕩平我

皇上東巡告成

闕里

特頒諭旨增廣直隸學額遂奮然興曰我

國家學校之設之造就人才也百數十年而加惠無已之心實亘古所未有士生斯時誠厚幸歟憶茲先達諸君子遊聖人之門而涵濡夫詩書禮教者既深且摯馨香俎豆之思雖百年如一日也迄於今碑摹石記中姓氏猶存後之學者登廟堂習禮器未有不觀

感焉而興起者今之視昔爲何如耶龍圖吳公爲予鄉先達予萬萬不能步其後塵顧以謬領是郡輒不揣有異世同途之感夫勸學興才良有司事也鄉之士大夫亦與有責焉爰是率乃僚屬力倡茲舉得數仞之墻共瞻美富兩楹之奠如接几筵而諸生相與登降俛仰其間景行而嚮往焉則後先相望亦庶幾仰副我

皇上偃武修文之至意也夫

乾隆四十一年丙申初秋

立

真定府重修文廟碑記

羅源漢

歲在丙申余按士至正定郡守方公謀重修

聖廟余捐薄奉助之鳩工庀材數月告竣俾來索記於余  
余惟客夏展謁之初環視殿廡門垣類多破損今則  
廟宇翼翼門廡秩秩宮中之池澄如池外之墻肅如  
墻表之坊儼如且於廟旁三忠祠故址設立書院顏  
曰尊聞萃十四屬之俊秀肄業其中猗歟盛哉何其  
慮之周而成之速也夫天下事創始難名因而實創  
尤難郡廟創自宋熙甯間距今及八百年雖代有興  
葺歲久殘敝亦固其所往者韓江鄭公亦嘗單心經  
畫十餘年來旋復就圯事之難舉可知郡守下車伊

始獨能以表帥之誠經營之果適觀厥成固其鄉之  
士大夫慕義急公而郡守之所以鼓舞而倡導之者  
其功爲不小矣余嘗謂宇宙之治亂視乎人才人才  
之盛衰由于學校我

朝石文重道百有餘年海澨山陬髦士向化况正郡近  
在畿輔恒嶽嵯峩滹波激宕天地嶽崎灑瀚之氣常  
有所鍾毓而發越郡志所載遠如魏鄭國李贊皇之  
謨猷經濟近如曹文節趙忠毅之氣節文章指不勝  
屈則斯舉知郡守之所望于此邦者厚也而余職領  
督學爲

聖天子廣儲賢作人之雅化睹斯美也不勝私心慶幸喜談而樂書之因為記其顛末云

乾隆四十二年歲次丁酉孟秋月穀旦

重修正定府府學文廟碑

王蔭昌

正定府為歷代省會之區故府學

文廟規模廣濶氣象崇宏甲於通省而修葺之費工程

大亦無有過於此者計乾隆四十二年重修之後迨

咸豐四年將八十年矣自

大成殿兩廡及各門院牆坍塌傾欹刻不容緩棗陽侍御

史公來守是郡下車伊始慨然興修正定令貴筑周

公竭力襄舉擇其甚者如名宦鄉賢各祠櫺星戟門

義路禮門週圍墻壁勸捐次第修理未訖事於七年

調任廣平接任者為德清徐公率屬勸捐續修

大成殿

崇聖祠東西兩廡文昌祠六忠祠輪奐峻崇棟薨巍煥至

奎星樓將次傾頹三牌坊僅有基址因費竭工停徐

公亦病請致仕蓬萊王公於同治五年接任旋值馬

賊髮逆相繼肆擾籌辦防守七年畿輔肅清正議接

修適是年四月奎樓坍塌為山平地經營鉅艱商同

刺史署正定令山陰胡公力籌鉅款并飭各屬勸紳

募捐責成正定紳董王世勳等實力舉行務期工堅  
料實八年王公予告旋里接任者廣德張公黃安劉  
公飭正定令新建夏公及各屬將已捐未交各戶督  
催交辦奎星樓二牌坊並前未完之西官廳一律完  
竣夫大廈非一木能支河海亦細流不擇自咸豐四  
年至同治九年閱十六寒暑之久其間旋興而旋止  
者或因郊警或因費絀所賴歷任賢太守賢令尹始  
終其事有志竟成其十四屬之紳民踴躍從公輸將  
恐後亦足徵

國家崇正學端風化厚澤深仁淪髓浹肌歷數百年而不

變也昌等感激奮勉用襄厥成謹載筆紀言勒之貞  
珉以垂不朽

同治九年歲次庚午六月 穀旦

重建正定縣學明倫堂記

彭華

學校王政之本所以育人才正風化也皇明建國之初詔天下興學正定縣學建於洪武七年前廟後學規模卑隘天順六年改廟左學右視舊宏壯而功以速成績久漸頹田侯下車卽欲新之因年饑未果越三年政成人和歲亦有秋乃謀興事作明倫堂深五尋廣倍之後卽舊堂爲退寢前腋以兩齋護以重門藏書有樓居生徒有舍處師有廬材良壁堅工善役勤偉麗完美前此所未有也昔先王制五服其經理天下有詳略後世以郡縣治聲教所暨亦必自近者

始正定冀州之域在唐虞爲畿甸歷三代而漢宅都  
不出冀雍豫故人才盛於北方及司馬氏南都建康  
趙宋不能有西北避金徙杭衣冠文物率多南徙皇  
明定鼎金陵徙都燕冀漸摩涵育至於今日南北人  
物彬彬郁郁於戲盛哉夫冀自唐虞以來三千餘年  
而後爲畿甸學宮自國初迄今百有餘年而後大備  
諸士生長於斯千載一時蓋益思所以自振以匹休  
前聞哉田侯名濟字汝霖識大體有政聲以余同年  
屬爲記學修於成化十二年八月落成於明年六月  
記作於又明年之正月云

重修眞定縣學碑記

宋仕

高皇帝再拓溷沌成祖定鼎燕雲山前後六百餘州  
悉返文明禮樂之區於是復古常山郡爲眞定而郡  
與附邑兩置學宮以明禮毓儁此眞定縣學所自昉  
矣二百年來譽髦相望鉅鄉輩出非若曩時苦於士  
大夫之寡識者學設而教不行也學再修於成化十  
二年厥後寢以敝殿廡傾欹支木而供蘋薦青衿露  
立而歌采薺庭除莽鞠茂草諸健兒繫馬而牧門  
無扃鑰狂夫諧豎鼻睡謔浪其傍而莫之禁甚至師  
儒宅舍亦不足棲其身蓋至於近歲而頽墮極矣諸

父老過此有洩涕而不忍觀者仕不佞以戊子冬忝  
奉璽書擁鉞來綱紀此邦甫弭節長老諸搢紳先生  
幸臨首述黌宮圯狀而言曰昔某輩會薪於斯樵於  
斯而弗意乃今若斯墮也卽戊子鄉乏薦髦矣敢煩  
執事詢其故乃知歲時督部憲臣行部使者謁庭講  
經義俱泣郡庠而不下附邑其餘鄉飲讀法亦然邑  
宰率教官弟子員弦朔趨郡刺史受約束恐後視邑  
之學舍猶贅己是以藐然漫弗加理間有豪傑之士  
志興復者苦於送迎之困也工程之浩而財告訕也  
慮生事端而囿謗讟也蒿目趨趨罔以上聞相代如

傳舍而莫之敢舉無怪乎頽墮至此極也不佞聞之  
瞿然喟息曰凡憚敢作者以貫尙可仍與夫作無益  
焉爾疇謂興賢育才之所而可一日苟安者乎十家  
之市尙有半畝之宮以崇匪鬼我夫子古今一人而  
以支不釋奠神則胡饗十金之產敦師以教厥嗣必  
且飭垣堂淨几寮而後樂羣敬業焉矧茲濟濟縫掖  
之徒與若師露立講綿叢出入與健兒狂豎相肩摩  
也棫樸之謂何且也紀綱風化教學爲先而敦說詩  
禮宮墻莫近不佞其何說之辭諸先生且休矣不佞  
疾與諸大夫圖矣維時兵憲顧大夫亦感懷激切亟

下令議估費值約五百有餘鏹乃克濟而權以社庾之粟請余曰庾粟生民之命也彼終歲勞苦自以積貯惟祿歎是備奈何輕動其再議會是冬尹刺史自天雄移視茲郡事至則毅然請曰官修學而動民粟計誠左顧邑當省會之衝令方困供億莫支雖巧婦不能作無米炊守請從事乃撝括巨盈之帑有別貯積鏹若干繕其半可以充前估之費於是顧大夫力贊其決而不佞與何直指君同嘉樂之下檄邑令親董厥役勿俾猾蠹有所侵漁苟具文書塞責於是以是年二月興工令陳所問旦夕親相畚鍤易朽與頽

大創其所庖舍門廡丹朱潔聖煥然一新計僅鏹金三百有餘兩贏一百有餘兩告成於七月初三日去鳩工之期僅五易茲可謂費縮而功過矣告成不佞復輟然喜曰甚哉當世者無難成之事也難於任耳下欲任而上官弗信則弗成上肯任而有司調劑弗善則弗成調劑善矣而董役率作弗勤則弗成是舉也顧大夫任議太守任賦令任勞而余與柱史君亦竊任信遂相濟而適觀厥成焉昔者頽謂斯何財甯不足人弗任今者重新謂斯何財甯有餘其人任引而伸之卽以肩天下之鉅乎亦何難其爲余庶幾藉



是以塞諸父老之命矣雖然不佞業有進於諸人士者夫士固視學舍爲肄業之肆也士亦自有肆仁義忠信靈臺故物也勁勇沉靜確魯少文燕趙士之本來也其在於今豈其尙斤斤然局守賢聖之閑鑰居道德之府毫無罅隙乎其初無亦功利嗜慾之私入其靈臺焉而汨將勁勇者傲而俠沉靜者傲而譎確魯少文者傲而務華絕根不啻若子瞻氏所稱無知而近於好亂倘其弗刮濯樹建惟波靡是安而反咎於肄業之無所也抑又諄矣夫師生無舍庖廩無次有司之責也有司者任之耳剗馭而歸厚漙漙而越

醇乘其未盡滴而完其所本有則有司烏所用力任固在士異日者正人滿朝羽翼世道實諸人士是賴毋侈科甲蜚聯以梯利祿貽任事者羞於是諸長老及諸大夫再拜稽首曰公斯舉是大有造於後學也不可以不記遂登石而鐫之

正定邑侯鄭公修明文廟祀典增建學宮庾碑記

許守謙

古者建學必先釋奠先師其禮樂之器旣具則釁用幣告成而後從事焉敬之至也今天下郡縣皆有廟學崇祀令式具在登降獻酬之節牲幣粢盛之數有

司者歲以春秋舉故事無敢墜至祭器未盡備牲牷未盡具一切廢缺未盡修舉賢守令非無意焉顧以財用出納之艱而遷代傳舍之過及也則率循襲取具文已爾其於竭誠盡物報本事神之道弗講正定古東垣邑畿以南稱首封焉國家文命誕敷聲教所施實先被之其廟學在縣治之西規模宏敞風氣完聚以故邑之人文蔚起後先相望不乏鴻公鉅卿彬彬稱盛焉歲辛丑元嶽鄭公以名進士授元氏令愷弟詳敏卓然循良尤能任事加意興除當道為鸞鳳擇棲調繁真定甫下車謁廟觀禮制缺略邊豆簡薄

嘆嗒低回穆然深念曰夫器禮之所繇著而學才之所繇育也廢闕不稱士氣載鬱無以觀四方吏職謂何慨然捐俸金出帑羨益置祭器若干事益供祭牲若干口前此以附郭故祀事統於郡守全禮久廢不敢憚勞一旦毅然復之祭之日誠孚敬格諸助祭者及諸弟子員皆凜凜罔弗慎肅又卽學之隙地新建學廡創設學田積穀以贍諸生之貧不能養不能葬不能娶不能褻者事以次舉蓋及公之政成而文廟祀典爛焉修明諸寒士俯仰有賴矣公復時以鄉三物勵多士抑其奇衰拔其俊者而督其不勉者士何

城崔守仁李稽古等感奮踊躍聚族語曰公之大有功聖門也大有造於吾黨也爲德至厚夫旣或戴之敢忘頌說則相率詣學博士順德徐君化榆社裴君文紳霸州王君三接謀礱石而志其思託不佞屬辭不佞聞之傳曰不有廢也孰能興之又曰有其舉之莫敢廢也夫興廢舉缺談何能容易抱明通之識者或局於運量負揮霍之才者或踈於鑒觀不則耽閣居諸而時弗逮掣肘財用而力弗及如前所云云非品堪大受才擅兼長者鮮克有濟焉卽公今日之舉先是非無有見及之者然若有所待而不遑也孰能

如公視國事如家事崇祀則竭誠盡物養賢則悉慮殫心而敏識長才若游刃若運斤者乎公之大受可徵已然此特公美政一斑耳至於剔姦振罷恤民易化百度改觀四郊安堵吏行春冰之上民居寶鑑之中則慈父之歌神君之號自有四野之口碑在焉它日邑萬姓當復礱石頌之矣由今以往所以竭精摠志佐巖廊修百姓之急興禮樂之化者當不損於治邑時余且日暮埃之夫美則愛愛則傳諸博士弟子員之舉有以也余何可以不文辭乃爲之記并所勗學廩楹數所設學田地畝數勒諸碑陰以識公之德

惠於不朽云公諱三俊字中一萬歷戊戌進士直隸建德人也

重修文廟記

梁清寬

善乎前喆之言曰事可已不已者罷民者也不可已已之者迷民者也罷民特蠹力耳迷民則事墜綱斃相率于魚魚鹿鹿之俗長吏之謂何故古賢守令于傳舍祠宇必飭必戒薛馮翊張益州咸以之辨才之短長焉矧學宮為尊師崇祀興教首務者哉吾邑有泮宮辟雍居乾之脊易稱剛而文明者嘉隆間明碩肩相望廟貌亦復顯敞峩煥後六七年而衰人文

黠抑即戟門之側半鞠為茂草亦若氣數人事之適相感召也

大清受命文教聿新邑人士霞蒸焱奮矣獨釋菜之宮摧圯剥落風雨割其隅霜露降于席雖駿奔豆籩如故典未可謂奏假惟虔也粵歲辛卯邑侯張君治最幾三稔禔躬清約政務整暇雖符檄輪蹄為諸道奏而處之裕如猶可以其才之餘旁理墜緒爰顧瞻頹廟慨然身任之先捐若干緡為倡而備兵使者陳君郡太守崔君郡佐杜君別駕房君司李杜君各捐俸繼之紳士感諸君意快輸者趾相屬也侯復綜理有法

出入責司者督課則耆民強有心計者不兩月告訖  
事宏隘發部易朽正傾丹采所塗墜茨所庇翼然聳  
觀矣張君重斯舉也命余爲記余聞之上者民之表  
也其示民不可無其道夫民之爲性稟于土者其質  
殊感于化者其尙殊成于樂者其安殊知其殊而納  
之道者則上之爲之也在上道化之興雖不以迹教  
然吾夫子肇明六經如日麗天天下則而儀之爲天  
下君者追而顯之春秋明禋入其庭登降有數鐘鼓  
在懸執酌歌雅彬彬禮樂備焉是則以跡教不僅以  
跡教也張君蓋有感于斯義哉然竊計古者有學而

無祀至宋始合後代因焉今廟貌新矣廟之右爲明  
倫堂前爲進德修業二齋後爲博士公署或圻或踦  
甚至址僅存斯固古庠序所稱立教者由之受講席  
也侯以東垣瘠邑難以舉盈于數者尙仍然焉特先  
其急者顧吾以侯之才之心力知其必有後舉也余  
不敏請執筆以從願觀厥終事云

重修正定縣文廟碑記

陳惠華

嘗聞學校者王化所由起也士習正則民俗淳師道  
立則賢才出以故其廢也有漸其興也有機故因循  
積弊於數十年之間或鼓舞更新於一二人之手雖

曰天運豈非人事哉况夫數極窮而乃變道待人而後行學宮茂草世多視爲漠然久矣苟非有認真此道者公以倡先誠以動衆勤以督事明以任人而欲於頽垣壞壁中煥然改觀復烏革暈飛之舊匪易易也東垣郡首封宮墻規制素稱宏敞余總角時隨家大人任肄業其中但見光華凋謝墻宇傾欹雖補葺頻加而全局瓦解家大人時以爲憂而力恒未逮歲辛丑 明府李公以滇南名孝廉來合茲土毅然有修舉廢墜之志家大人嘗囁然曰

文廟復興庶有冀乎癸卯夏霪雨如霖門墻殿廡之區幾無完宇 李公於謁廟之頃悚然動容謂家大人曰是尙可以旦夕安耶矧今

上諭諄諄學宮首重革故鼎新吾輩責也爲先捐俸百金作一邑倡隨招在城紳士於明倫堂勸以大義量力輸資無不雲集響應家大人復携 同僚田先生於紅塵赤日中徧歷諸鄉大聲疾呼若援手而拯陷溺一時感動樂助者多有胡村諸生王吉士家故寒儉一聞斯舉輒傾囊以十金應噫人之好善誰不如我而謂誠不動物者未之前聞爰是諏日鳩工大興土木董斯役者孝廉則白君璉韓君靖明經則吳君方

來王君綸煊國學則胡君起龍生員則劉君延李君  
潘文君士彬胡君瓚楊君春暉罔弗潔乃心虔乃職  
一磚一木出入必稽或匠或傭情勤必察凡厥物力  
不經胥役之手不墮牙儉之奸費少工堅事半功倍  
歲星再易而大績告成猗歟盛哉今茲備員玉署  
李明府暨同事諸君走尺一乞余言為記余聞之而  
重有感也從來志果堅神必祐之福將至氣先呈之  
正定背倚恒山面臨滹水形勝之勢甲天下其間為  
名臣為碩彥載在史傳者指不勝屈而

本朝相業輝煌蕉林為最今黌宮濟濟意將有接踵而興  
者乎不然何以時近百年未聞修舉而美輪美奐適  
見於

聖天子御極之初且也工程雖大而費不奢物力雖艱而  
衆不吝藉非以真實心行真實事而邀天人之協助  
者亦烏能若是余不嫻於文惟是三復於廢興之故  
應感之機景賢候之重道嘉同志之急公先繕稿以  
呈家大人諒必曰此重修之實錄也歟哉若云揚風  
扪雅以示來茲則余豈敢

重修文廟碑記

王定柱

聖人生而後人道立聖人沒而後報祀隆聖人之道如白

日然益萬爇火不爲顯損萬爇火不爲晦數千百年  
以來牲玉廟食用王者制度達於天下或者偏邑僻  
壤典禮不備於

夫子曾何汗隆焉然而

朝廷崇師重道陟降對越嚴事於辟雍其郡邑庠序寄在  
守土之吏歲時禋享隆禮備物非徒以載德報稱翼  
厲庶士亦足以昭宣盛烈感發兆人之心志瞻望宮  
墻肅穆翼翼栗栗跂焉思見道義之富禮樂之熾思  
朝廷之所貴知人倫之規矩表臬卽三代可旦暮致顧使  
廟貌廢闕弗嚴弗恪將無由奉揚

朝廷德意此郡邑長吏之所怵怛亦博士弟師與有思焉  
正定故爲畿南大邑而締造旣久學宮棟宇日隕圯  
兩廡爲諸賢俎豆地雨雨風風椽薨漂搖以絀於力  
未之能葺也歲壬子邑令張君慨然圖新之會遷去  
不果瀕行出五百金畀子錢家約曰他日以是爲學  
宮費張君去三載而得金凡子母六百四十有贏博  
士師與董其事者諸子會計經費略足藏事廼以告  
郡伯楊公新令尹劉公兩公皆喜力爲董率爰鳩工  
庀材諏良任役始於乙卯之春二月闋五月而竣敞  
者完黠者華肅如穆如復舊規矣正定夙號衝邑急



徵大徵靡歲不有而張公獨拳拳起化之地瀕去而  
不忘者誠知

聖德與天地同流不以遷去得有畛域而楊公劉公能終  
始其事以成前人之美誠念廟貌廢興上關

朝廷教化之本斯守土者所爲亟亟也今茲役舉而衆不  
擾載輪載負卽博士得藉手以告無罪而正定士若  
氓瞻望宮墻油然懿德之慕樂宜鼓舞濯磨何如也  
旣落成敬志歲月于石垂之永久張公者名健遷爲  
灤州牧楊公名濬文劉公名浩並山右人

重修正定縣文廟碑記

王世耀

邦邑之榮瘁眎其黷序而知之廉陞塵荒門廡籜敗  
清淑溫粹之氣不寓於笙鏞俎豆間則文教摧沮冠  
裳絃誦之倫日蕭焉而卽於陋矣茲正定 文廟修  
自雍正乙巳至今一百二十年顧以枕恒帶滹畿藩  
雄劇之區易藻芹而榛灌可乎歲在道光乙巳邑司  
教博士朱公鈞蘇公啟紋周覽 夫子之廷慨然興  
畫始以復葺之意擁於邑侯侯今遵化刺史梁公  
寶書倡捐銀一百兩州黨衿庶各率緡錢辨方庀材  
遵規卽度經始以迄落成歷二載餘力不疚民貲不  
弊帑而門而廡而廉而陞楣棟榱桷丹雘塗墍斐如

邠如不僿不侈丁未春祭陟降灌猷儼乎庭陛之靜  
深秩禮之尊嚴也夫君子禪化善得其端若博士兩  
君之敬典禮邑侯梁公之衛官校不可謂知所先歟  
由今而後驛驛冠裳雍雍誦讀大廷升舉而登孝秀  
細民觀感而興禮讓笙鏞俎豆榮瘁易觀生是邦者  
能已於忻愉拊歎起歌文教之醇哉董役者李君文  
達馬君廷臣郭君殿元田君錫例得備書於石

重修正定府

文昌殿暨 三忠祠碑記

蔡 封

記稱日月星辰民所瞻仰也載在祀典又曰以死勤  
事則祀之又曰有其舉之莫敢廢也正郡

文廟之東有奎星閣閣後數武有

文昌殿殿後又數武則爲 三忠祠文昌者星垣之上宮  
象似戴筐臨於斗魁名曰天府六星分主文武祿命  
而三忠者祀唐常山太守顏公及公弟平原太守魯  
國公明季增祀宋南康錄事歐陽公者也皆以忠義  
殉國取義成仁後先一轍故竝祀焉歷歲久遠廡宇

傾頽惟奎閣巍然獨存而殿與祠日就荒廢矣歲戊申余奉

命來守是郡攷之郡志觀厥遺規慨然思有以新之會紳士等亦有以是請者顧堂基毀壞已甚土木工程亦大不易因爲捐俸若干以爲經始而十四屬之矜秀聞風相應踴躍捐輸數月之間又得若干數猶不足則余又力任之始工於辛亥正月板築旣興棟宇旋立有像者新之有主者髹之迄四月而殿與祠復還舊觀郡之人士奔走瞻禮莫不欽仰蓋修廢舉墜立懦廉頑非獨守土者之責亦

神之有以默佑之也工甫竣而余以事將去恐後之無所据也因述其緣起而泐諸石刊捐施者名數于碑之陰至

文昌感應之蹟及三公忠義之事與里居名位載在史策詳于志乘煌煌烈烈煥若日星皆人所考而知樂頌者故不詳云

正定府知府張範東請將郡城三忠祠改爲六忠祠

稟敬稟者竊

卑府

伏查

國家肇立祀典昭忠與名宦並設專祠一以獎賢能一以勵臣節雖同受俎豆馨香之報要必循名核實各視

其終身大節以爲歸其或幸而遭際承平從容治理果能爲地方造福則毋論小廉大法皆當入名宦祠其或不幸而遇危亂責在守土寇已嬰城斯卽素稱循良者亦往往束手無策唯智勇兼全之士有存亡與其之心事濟則君國俱安勢去則身家並殉此其所關者甚重而其所成就者甚難不得僅以平日之政聲轉揜其取義成仁之偉烈所以史家特立忠臣之傳而諡法必榮一字之褒倘使表揚間有佚遺位置未能允愜則後之守令責所不容辭也正定舊有三忠祠始于前明正德八年奉勅建祀唐常山太守

顏泉卿平原太守顏真卿額曰二忠其後天啓二年知府徐騰芳增入宋南康錄事歐陽珣以配二顏珣于建康中奉命割河朔地至深州城下以忠義勸勉守城者爲金人所殺時深州亦隸正定故奉祀于此此三忠祠之所由名也

卑府

抵任後瞻拜祠宇旣切

景行之仰轉深憑弔之思夫正定爲歷朝設險之地英雄之所必爭宋金元明屢遭兵燹號爲百戰場其時封疆司牧之臣豈盡明哲保身委蛇觀變者何以三忠之後閔其無人得毋秩祀之典獨有所闕而未備乎因同正定趙令展謁名宦祠披閱府志考其事

實唐宋以來名宦三百餘員之中果得三人焉一爲宋之李邈清江人靖康元年知正定府視事未幾金兵壓境城中士卒不滿二千邈勸民備糧誓衆禦敵及城被圍援師不至且戰且守相持四旬力屈城陷巷戰被執拘于燕山府勸其降憤怒詆之搥其口叱血噴之遇害之日金人亦爲流涕事載宋史與歐陽珣同時而壯烈更甚乃錄彼遺此於義未安一爲元之鉞納錫彰至正末年爲正定路達魯花赤明常遇春兵薄城下是時廣平順德保定諸郡望風皆靡錫彰獨固守不下旋聞元都已失順帝北行乃著朝衣

冠登城再拜墜崖而殉是真能從容就義者也事載明典畧而未褒其忠殆明人嫌其拒命之故又其一則明末之徐標也標臨清人天啓乙丑進士崇禎十六年任直隸巡撫建言修練儲備四事奉詔頒行是其平日經濟勳猷已卓然與古大臣爭烈及流賊陷山西加總督銜駐正定以遏賊賊僞詔至怒碎之斬其使正定知府某潛移家屬出城標執之下獄登城爲固守計部將與賊通劫標迎賊大罵不從昇至城西門交刃殺之全家盡節于官廨井中被難最爲慘烈事見明史莊烈帝紀其年代較近父老傳述猶有

能詳知始末者卑府 何趙令親訪遇害之地盡節之  
井遺跡具在生氣常存府廨大堂有其題額忠孝廉  
節四字適健端嚴尤可想其神骨見者徃徃咨嗟  
泣下焉夫此三人者原其初志亦自願爲承平之良  
吏而不必以舍生殉國爲名高而適當夫孤城纍卵  
之時遂各失其勁草疾風之志所不敢忘者君臣之  
大義所不忍棄者塗炭之蒼生視刀鋸爲分中置妻  
孥於度外迨至肝腦塗地祇行其心之所安英靈在  
天猶且爲敵之所囑異代同揆炳耀于滹沱恒岳間  
固不讓二顏歐公獨有千古者矣乃後人僅躋諸名

之班幾並忘其效忠之節雖苾芬勝蠶而名實差池  
似覺留餘憾于人心未足昭定論于祀典也恭逢

大人保釐三輔風化羣倫旌表且及于里閭褒揚詎遺

夫忠烈卑府 書生見解以爲爲太平之臣易爲亂世

之臣難幸生干

重熙累洽之朝益憫彼困阨艱貞之士敢請將宋李公邈  
元級納公錫彰明徐公標增列二顏歐陽之次三忠  
祠改名六忠祠春秋同致享祀庶使忠臣姓字倍彰  
于燕趙之郊而名宦祠堂專重夫循良之績旣符體  
制亦洽輿情如蒙

允准卑府與趙令遵即捐廉重加修葺謹當撰文勒石以誌

大人闡發幽光扶持名教之至意合肅具稟

正定府六忠祠碑記

屠之申

六忠祠在正定府學宮之東初名二忠明正德八年勅建祀唐顏忠節公魯公兄弟天啓間知府徐騰芳增入宋歐陽美全改稱三忠相循至今夫魯公與歐陽皆未嘗至正定一則以與相屬一則以地相隸並祀於此豈非忠臣烈士無往不引以為重乎然固有守此土保此民身與城俱存亡者而不獲配食于忠

節則又何也歲戊子濟陽張君曇村來守正郡瞻拜祠下慨然有興廢補闕之思於是流覽志乘求諸名宦中得三人焉在北宋之季則嬰城拒敵援絕被陷始終不屈者有若李邈在元則堅守一城國亡君去而後從容就義者有若鉞納錫彰在明末則孤立遇賊為逆黨所劫全家殉難者有若徐標三君子者經濟政治簡冊可徵成仁取義大節不奪而皆効忠於茲土曇村擬奉三粟主列二顏歐陽之次題曰六忠以昭示士民乃上書請於予予讀而憐之因以歎古人樹立之甚偉遭逢之不幸而曇村此舉其用意蓋

有在焉夫磨世礪俗莫大乎忠孝學人而既知之矣  
鄉間田野之愚民生不識經史之文不明春秋之大  
義非有以欣聳之則不足以動其感今如父老閒居  
道古庸婦孺子或聞奸佞之卑汙鮮不唾之詈之語  
及忠孝節義之情狀輒爲之贊歎且泣下焉鄉隣之  
勸激猶如此况一郡之尊長有所褒崇顯示于其間  
則必且傳而述之敬而慕之以爲此昔之官吾土與  
吾祖宗同患難者身後數百年食報如此忠義誠不  
可磨滅哉君臣之分既然卽凡父子夫婦兄弟朋友  
莫不當然其善心將油然而興起而不自覺則此一役

也所以表揚節烈爲風俗人心計者至深且遠矣曩  
村莅任數月遂及斯事豈三公之英靈冥冥之中默  
啓之耶抑循良實政理明闡幽而古人亦有遇合之  
緣歟予旣欣然允其請且檄諸道府凡類是者咸以  
爲法他日各郡縣踵而行之庶使古人無不發之幽  
光畿輔無不興之民俗於以扶名教植綱常爲天下  
後世鑒則正定府六忠祠爲之始也曇村與正定令  
趙模共捐廉俸新其祠宇庠者崇之隘者擴之輪奐  
丹雘赫然偉觀落成之日予爲記其顛末及其用意  
之所在以告來者六忠行實別刊貞珉不復贅云



道光九年歲次己丑重修

重修六忠祠碑

徐塘

丙辰之冬余奉命來守是郡朔望詣

文廟行禮見其東之六忠祠傾圮日久其中粟主俱露

立莫庇風雨卽慨然有興廢舉之念多事叢集未遑

也夫一鄉之善一邑之善凡建祠樹宇者猶且因時

補葺廟貌聿新見之者溯其懿行嘉言以爲世之爭

自琢磨者勸而况此數君子者生秉河嶽沒爲日星

在當時則一朝之光爲後世垂百代之範崢嶸大節

彪炳史冊間又且屈在郡城爲公卿大夫之所觀瞻

學士文人之所景仰而顧令其頽垣敗宇零落多年

一郡官紳莫有過而問者此余所以每念及之而惻

然者乎越二載尊聞書院掌教馮君子哲見而傷之

因教諭吳君訓導劉君請于余余曰此我之夙心也

亟捐俸廉以爲之倡和之者且不一而足爰命吳劉

二君董厥事月餘而功告成閒嘗於公務之暇披覽

志乘見夫天寶之間漁陽煽動河朔爲墟忠節公袒

臂一呼應者四集當其時遙爲之聲勢者平原也難

兄難弟東西輝映誠古今僅見者哉泊乎宋金爲敵

歐李捐軀元明就衰鉞徐殉難成仁取義千古同符

傳至於今猶有生氣嗚乎此間所謂振靡起衰扶世翼俗者也夫人以平居無事之日見慷慨捐生從容赴義者則愛之敬之咨嗟而稱羨之其有苟且幸免志節無存者輒不禁詬之詈之鄙夷而不樂道之以爲若者吾亦能爲之若者吾所斷不屑爲之也一旦兵臨城下前後若兩人焉又其甚者以所事皆吾君謂富貴之自在朝臣楚國暮謁秦廷覲顏世間雖生猶死而數君子者志堅金石節炳丹青忠于唐者張許魏美忠于宋者文謝爭輝忠于元者烈比余陳忠于明者名並范史或屬以事或隸以地或表章于先

後之不同時其事蹟不必無殊而其所以爲精忠亮節則一也余旣心慕其忠又數于朔望展禮之餘目覩其祠宇荒落蓋有心于修葺之者屢矣此卽無他人之請而余興廢舉墜之念蓄積于數年者終有所不能已也而馮君此舉正與余心有適相合者哉至二顏之何以盡節于唐歐李之何以竭誠于宋鉞徐之何以無愧于元明載諸史者有傳前太守張公已詳言之茲不復及也是爲記

同治二年修

節烈祠記

范志完

史氏之言曰女子之行於親也孝婦也節姆也義而  
慈至矣嗚呼豈易言哉自彤史職廢姆訓 立

母而父母而師 傲嬰 將無過焉或舅姑無恙遂

訣兩鬢愁入機絲淚調朝膳至刲股醫親遂感神救  
女中若有聖人此蓋參閔之徒歟或天只不諒當崩  
裂甫定卽議改妝乃恥踐二庭相從地下或失身狂  
且日從飲博空山自憎貨及妻孥義旣中捐似可登  
車告絕而猶能以禮自閑畢命初姻或光輝自好猜  
料咸生石心難泐竟獲全璧古云守節之婦等諸守  
節之臣使有髯如戟庸詎知不爲平原睢陽文山疊

山諸公耶凡此者行雖不一要皆烈並秋霜心同皎  
日所謂黃金鑄 女之心信不誣矣予近羨徽躅遠  
追慈訓遂構祠院之左若夫二祭之費香火之需以  
及廟祝之糧皆議確可經久行則哀合郡節烈婦女  
合祠乎中而春秋之祀肇焉或曰所得知者則旣儼  
然血食矣其或貧家荆布事高前良聲旣沈於里耳  
名不上於有司至不得以宛轉一死博廟中之一爨  
其情亦可傷也而不知被吾知者享吾祀其弗被吾  
知者享吾意享祀則報美是謂好德之常享意則無  
窮是爲教思之本知予心者則予今日之舉豈但爲

婦女也耶

重修正定縣節孝祠記

關炳

節孝之有

旌揚所以闡幽光而維風化典至重也然則俎豆馨香之

報正以上體

德意下慰貞魂其或廢焉責有攸在正定縣節孝祠在縣  
學之東歲久傾圮葺荆蔓草中僅存遺址一區余循  
覽之次愀然感喟以苦節勵行冰蘖一生而乃靈失  
憑依祀儀遂闕表彰之謂何且何以興觀感而成激  
勸爰與同城諸寮案各捐廉俸而郡邑之神若民間

風樂助如恐後時於是大者宗小者桷材咸庀也乃  
者斲斤者削工皆集也營始于孟夏之吉閱四月而  
落成序以堂階繚以堵墻設牌位于祠中祭祀永昭  
佞備以期仰副

國家章志貞教之意云爾

重修正定節孝祠記

胡元照

余讀郡志至烈女傳見其志勵冰霜光爭日月未嘗  
不掩卷太息謂士窮見節義而節義不忒往往難之  
乃以閨幃弱質能斷臂剖心捐生就義茹荼飲蘖節  
苦自甘豈天地正氣獨厚於若人亦真識者有定力

耳宜歷代相沿既予以旌表復祀以馨香也正定節孝祠由來已久重建于道光庚寅年至今垂四十載墻垣皆圯簷宇將傾不卽此葺補數年後又恐廢墜矣丙寅夏王大尊來守茲郡每于朔望宣講

聖諭畢因合所屬官紳以維風俗正人心相勸勉城內紳士乃查城鄉節孝宜舉者請于府學備文轉稟太尊慨然以請

旌入祠爲已責且勸廣爲採訪勿使有遺今年春入祠各家見廟貌頹敗不足以慰幽魂也稟請捐資修理太尊嘉之卽派學官總其成紳士董其事廢者興缺者

補葺者新工甫月餘而事已蒞輪焉奐焉著

皇恩正祀典彰潛德勵世風胥于是在也爰爲記其巔末重修恒陽書院記

趙南星

今天下郡國學宮之外徃徃有書院所從來遠矣蓋當道者掄學校之秀而羣肄焉所爲宏闡國家作人之意甚盛美也自江陵相國持權其鄉之士譏之遂遷怒而盡毀天下之書院正定故有恒陽至是廢壬午遂改爲遊擊將軍之署壬子當大比士督學缺人上命直指汝南傅公攝其事得人爲盛遂決意興復明年正月檄府別建遊擊署而以書院還有司發贖

緩七百餘金中丞汝南劉公郡守周公司馬陳公佐  
焉經始於正月成於七月重門之外爲坊內爲講堂  
東西爲精舍凡十四所講堂之後爲長廊有堂有廂  
後有水亭一如舊時之制又置田以資給諸生於是  
三十二城之名士皆至有文學造余而問曰今之教  
士不以道德藝倫惟文詞之尙如是則郡邑有學宮  
矣又益之書院是不過使諸生多取科第而捐公帑  
勞民力倘亦可以已乎余曰卓哉吾子之問天下之  
無教化久矣然道固不廢文詞之所稱者非道德藝  
倫耶心會而身體之古教化在其中矣夫國家設科

第以羅士士非此莫繇自致江陵故楚之貧諸生也  
繇科第進一旦而肆滔天泯夏之惡彼其蒙被國恩  
豈不厚哉爲善者不尊顯則名不彰爲惡者不尊顯  
則身不亡科第自榮非人則辱士在所自樹耳蓋已  
已之歲余讀書恒陽書院當道聘請阜平廣文艾純  
卿先生楚平江人也博學能古文平生慕李獻吉之  
文章氣節數向余道之明年庚午余隨諸君子舉於  
鄉是歲得人稱盛多出艾先生之門者頃之先生入  
爲刑曹丁丑劾江陵奪情事遣戍明年而廢天下之  
書院江陵敗後艾先生起爲蜀開府余不肖生鄙小

縣自見艾先生而後知覺漸萌志意稍立故教人者不厭多方好學者不厭多聞時周公屬余爲記余旣爲述其廢興之故併記與文學問答之詞以明當事者作人之意爰勒之石用垂不朽

始建風動書院碑記

鄭大進

學記離經辨志而後三年五年七年視敬業則曰樂羣視博習則曰親師視論學則曰取友教學之法有取夫相觀而善也顧古者國之有學立師釋奠菜之宮必列黌舍以居學者黌亦曰橫學宮南嚮橫舍則東西峙列以聚諸生後世昉古立學郡縣皆然然第

子員不過列名學冊正定在前明成化間太守田公濟疏請於師儒官舍之外傍尊經閣置號舍一區閤五十郡弟子日肄業其中風猶近古宏治以還廟碑林立黌舍非復成化之舊矣萬厯四十一年趙忠毅重修恒陽書院一碑每諄諄于成毀之故蓋黌舍廢而書院興其事于學校實相表裏士生三代後所爲收雲漢作人之功以操化民成俗之要道莫有先於此也

國家百年禮樂

聖天子尤加意右文郡處名賢輩出之餘猶無講學之所

標準未立則其趨歧觀感不親則其氣靡文風士行之不古若固然無足怪余自丁丑下車卽求府治西北廢址爲復故之計旣以地勢卑下且去學宮遠意未決也且其時余方有事

文廟學署之役加以纂輯志乘不暇兼顧歲甲申適獲邑有罰鍰六百餘金合以官商士民所捐輸幾二千緡余喜夙願獲甯謀于衆得唐成德軍紀功德遺蹟其地宮墻及門右臨廳事省試旣便向往非遙遂卜築焉始于仲夏之吉至孟冬而功成董事則藁城學博王君臣也昔趙忠毅謂恒陽書院內外有坊有亭學

舍講堂規制完美是役也門二坊一亭一師弟子堂廡房室十所計四十間芳徽猶如昨也而地勢之高敞過之考志唐王士則紀功碑曰風動碑今就其地廣域樸菁莪之化六月之鵬積風厚而負聲有力搏雲九萬擊水三千將于是乎在語云君子之德風書云四方風動王者建國君民教學爲先此意殊近也因名之

新建正定府尊聞書院碑記

方立經

書院之興廢豈不以人哉正定自宋熙甯間吳公中復創建郡學於金粟岡志所稱作人令地者是也至



明嘉靖王公騰乃改天王寺爲崇正書院厥後或曰恒陽或曰六諭我

朝前守鄭公始址察院舊基而新葺之曰風動蓋義取唐成德軍紀功遺碑也其後又以常山額于門究未遑一日聚師生其中當其興也有楚平江艾公爲之師卽有高邑忠毅趙公爲之弟友教一堂英賢輩出及其廢也變而爲營署再變而爲試院三變而爲郵亭然則議書院於正郡亦難矣顧又思之守令之責教養並重今郡縣非無學也師儒非無官也旣不能舉蘇湖之職於上以惠多士又不能借河汾之教於

下以掖後進徒使枕恒帶滹靈秀鬱結之氣終委運於無待而興之豪傑其可乎况輜軒駐節暴土而市

常山書院

久爲公館禪堂僦居驅儒而釋

肄業生童現寓

斯尤

守土者之羞也

經

不揣固陋重修郡學

文廟之餘兼籌茲舉惟東祠址一區近宮墻而遠廛市爽塏明秀奎曜高臨實爲勝地遂價置民舍以充拓之鳩工庀材刻日葺事爲橋爲照壁爲重門爲講堂爲課所爲內外舍共四十二間庖湑井竈畢具繚以周垣仍鑿池種蓮於內資其遊息是役也制嚴而樸局整而舒門不吝軒廳非旋馬惟于講學爲宜則兢兢

有苦心焉落成司事者以名請伏讀我

皇上駐蹕郡城

御製隆興寺詩首云董子有言尊所聞登高一呼提倡道  
學深切著明謹奉

天子命以臨之曰尊聞書院夫尊所聞則行所知在其中  
矣道本一貫學無二致其根柢不外六經其切要不  
出五倫其下手在義利之辨其得力在誠偽之分時  
時體認天理事事參觀物情服而習之久矣而安焉  
由此處爲名士出爲名臣卽教卽學而淵源昭矣俗  
儒之陋也專事帖括而淺中速化工揣摩爲捷得聖

賢性命之旨國家經濟之方一切置之不講自誤誤  
人卽梯榮之應皆苟道也經特揭所聞之大者如此

使教者知所以教而學者知所以學則茲書院雖與  
鹿洞鷺湖同垂千古可也又何興廢之足云若夫博  
聲譽聚游談愒日玩時業荒行穢此最當事所不樂  
聞者故旣以爲勸而復戒之與有志者互砥礪于不  
盡焉

重修恒陽書院

傅振商

鎮城爲右輔重地舊有恒陽書院承聖主作人雅化  
萬厯初年中堂嚴士禁議廢毀改爲游擊府予持斧

兼攝學政跡之嘆昔爲青衿絃誦名區今爲赤老擊劍窟宅不勝盛衰之感因檄更置將士區宇發鏹五百金復構之因廣書室百間始於冀守接周守銳意捐俸董之前後數月告竣復拔諸髦士實其中覺文物煥然更倍往昔因歌以紀其事

恒陽拱抱滹沱繞衣冠文物擅八表鎮城中控翼神京勢吞河朔景突窈中有章縫讀書區風雲吐胸最清曉如何廢作大將府不育蛟龍巢貔虎文壇改面樹武幟檠戟森森驚風雨文星將避將星芒青衿欲歌誰爲主四十餘年絃誦歇墨池傾圯人物竭森森

兵氣慘林樾士子指點想舊觀徒向隕垣瞻故碣罔云黃閣逞胸臆劫塵相詬空怨譁琳宮寶刹日輝煌爭多幾間讀書屋况屬菁莪首化壤忍聽室傾鹿視肉我來持斧攝文衡臨風憶注不勝情飛檄速清名盛舊捐金更廣百餘楹數月翼翼復往蹟頌讀燈火夜熒熒墨香滌蕩汗馬氣書聲晝掩刁斗聲多士鼓舞據勝壘恍若登壇執牛耳草檄豈復羨盾鼻奪錦豈羨千金士爽氣倍增恒嶽色清波若添滹沱水豈是右文簡鉢註正學衣鉢鬼神護改作正爲仍舊貫星文隱映地靈聚方知素王遺教長焚書削迹誰能

錮提衡文武一憑欄取鑒興衰旦暮看重修原廣作  
人化開創益知帝德寬廢者有靈無須怒於今賢路  
正彈冠

重修恒陽書院碑記

趙文濂

恒陽者書院舊名也明嘉靖中知府王公騰改天王  
寺爲之萬厯初廢爲遊擊將軍署復之者汝南傅公  
振商也記之者高邑趙公南星也崇正末改爲貢院  
書院又廢矣乾隆甲申前守鄭公大進卽察院創建  
改爲風動丁酉前守方公立經選今地更建改爲尊  
聞道光庚寅前守關公炳仍以恒陽顏之新地錫以

舊名不忘初制也方公之建書院也闔屬捐銀六千  
餘兩發商生息按月批解束修膏火獎賞薪水咸取  
給焉每年歲修正定縣承辦若須大修向按十四屬  
大中小治公攤不在生息之內共銀五百五十兩九  
十餘年章程守而弗失而旁風上雨堂宇漸形殘破  
修葺者假手書役草率偷減工旣不實料亦不堅迄  
於今遂敗壞不可收拾矣同治庚午三月濂司鐸府  
學提調書院而劉崑圃太尊先於二月到任振興文  
教嘉會士林目睹書院情形急需整理辛未二月命  
濂估計工料擇要興修而未及十年州縣稟請從緩

四月山長陳露坪先生捐館命濂暫爲代理伏秋陰  
雨垣墉坍塌棟宇傾欹肄業生徒風流雲散矣壬申  
正月延楊鐵帆先生主講借屋以居遠在東門肄業  
辦差者咸以爲病書院既無人住連年積潦絃誦鼓  
歌之地鞠爲茂草之場工何容再緩乎癸酉九月  
太尊與濂及正定慶大令同商重修日例派修費若  
俟州縣解到方議動工則興修無日矣且解齊亦不  
敷用吾先行墊辦一面行文催解一面擇吉開工慶  
大令遂先捐銀五十六兩於是鳩工庇材擇人監修  
而勅濂總司其事料以市價買於商無損也匠以民

價僱於工無傷也大門三間重新鼎建者也講堂前  
穿堂五間東西齋房八間講堂後正房五間廚房三  
間揭頂拆修者也十一月初天寒地凍稟請止工甲  
戌正月初三日重修講堂渾堅樸素足壯觀瞻西耳  
房一間昔無添建者也東耳房一間昔有重修者也  
繚以垣墻安以厨竈黝堊丹雘煥然一新二月初旬  
工畢共費大錢一千一百餘千所有經費不敷皆太  
尊獨力倡捐三月十一日山長移入新居肄業生童  
莫不歡欣鼓舞振興文教嘉惠士林與前守方公有  
不後先輝映者哉方公湖北興國州人太尊湖北黃

安縣人皆楚人也機緣適相合也後之人踵而修之  
庶書院不至再廢乎謹記

